

Spirit i muvim ol..




Ol yangpela yut bilong ELCPNG i bung na pre na singsing long bikpela bung bilong ol long Henganogi, Isten Hailans provins.

Lukim stori long pes 11.
Poto Paulus Tali.

BEST VALUE SMART PHONE BLO PNG

Experiencim best Internet wantaim Alcatel Pixi. Kisim wanpla tude.



ALCATEL PIXI K99

FRI 200MB DATA INTERNET RED!

Ol tisa bai kisim moa pe

10% moa antap long pe bilong ol long yia 2014

Frieda Sila Kana i raitim

I GAT gutpela nius bilong ol tisa long dispela kantri bikos pe bilong ol bai i go antap, stat long neks yia, Janueri 2014.

Dispela i bihanim wanpela Memorandum bilong Agrimen (MOA) PNG Tisa Asosiesen na PNG Tisa Sevis Komisen i sainim long Pot Mosbi

long dispela wik Tunde, Oktoba 29.

I go moa long pes 2

Nau yu ken Teksim Wari, Tingting, Painim Pren, Kanage stori o Pas bilong yu i kam long Digicel namba 7235 6149

Painim Bal Resis i stap insait long p26... Traim laki bilong yu!!!



Famili Tri Stua long Wewak - p8

3G DIGICELPNG.COM
Digicel
Terms na Kondisens. Free 200MB Data bundle bai expire 3pda del behain lo date blo activation.

OX & PALM BRAND

True Buli Bif Bilong PNG.

CORNED BEEF

NET WEIGHT 340g

Gavman mas senisim ol wan lein bris long ol rot



Wanlein bris long Gum i save holim taim stret.

James G. Kila
i raitim

DIPATMEN ov Woks wantaim gavman i mas lukluk nau long senisim ol wan lein bris long ol bikpela rot na haiwe long PNG.

Planti long ol dispela singel o wan lein bris i save kamapim birua long rot na tu planti laip i lus pinis bikos long ol dispela bris.

Patrick Lofti, wanpela papa bilong ol kontrak trak na PMV i save ran long not kos rot (NCR) long Madang na tu Madang Lae haiwe i mekim dispela toktok las wik.

Mista Lofti i tok planti ol wan lein bris long not kos i as tru bilong planti ol dai i kamap long ol yia i go pinis.

Em i kolim tripela bris, Biges klostu long Sek, wanpela long Danip klostu long Sen Fidelis Seminari na wanpela long kona long Mirap praimeru skul long Iser wara.

"Sampela yia i go pinis wanpela famili i bin dai taim kar ol i ran long en i bam long kona bilong bris long Mirap na pundaun i go daun

long wara.

Dispela wanpela long planti birua wan lein bris i kamapim long rot," Mista Lofti i tok.

Em i tok Dipatmen ov Woks (DOW) wantaim gavman i mas lukluk long senisim ol dispela wan lein bris bikos moa developmen wok i kamap nau long kantri olsem ol maining projek na tu moa hevi kago bai go kam long rot na planti namba bilong kar i ron long rot.

Moa long en tu, ol wan lein bris i save westim taim bilong ol pipel bikos taim i gat longpela lain kar long hapsait rot, ol kar long hapsait i mas wet longpela taim stret.

Mista Lofti i tok sapos i gat dabol lein bris em bai isi long ol kar i muv i go kam hariap na noken westim taim long stop na wetim arapela long go pastaim na ol i muv.

Em i tok tu olsem ol dispela wan lein bris em Kom Woks bilong Australia i wokim bipo yet na i winim moa long 30 na 40 kismas na strong bilong ol i no moa stap. Olsem na DOW i mas painim sampela rot long senisim

ol dispela bris wantaim mani sapat i kam long gavman o ovasis dona.

Mista Lofti i salensim DOW long redim ol plen na painim ol ovasis dona o lain long helpim wantaim mani long wokim ol nupela dabol-ein bris.

Em i tokaut olsem Japan Intenesenel Kopresen Ejensi (JICA) i bin wokim ol dabol lein bris long Hailans Haiwe stat long Kainantu i go olsem long Henganofi na ol bris i mekim ran bilong ol kar orait stret.

Mista Lofti i tok mobeta DOW na gavman i mas lukluk moa long ol dabol-lein bris projek we i ken stap longpela taim na tu i ken helpim long sevim taim bilong ol kar na trak yusim rot long go kam hariap.

Em i tok bikpela samting em taim dabol lein bris i kamap em bai sevim planti laip long no ken lus bikos wan lein bris em as bilong planti ol trafik birua long planti rot long PNG.

Ol tisa bai kisim moa pe

I kam long pes 1

MOA bilong senisim ol pe na alawens bilong ol tisa, bai i stat long Janueri 2014 na pinis long Desemba 2016. Long 2010 rivi bes seleri o pe bilong ol tisa i bin go long K14,000 long wan wan yia, abrusim K10,000 bes pe ol tisa i save stat wantaim, bihain long ol i pinis long tisa koles.

Tasol nau, bihain long 6-pela mun long skelim toktok i go i kam namel long PNG Tisa Sevis Komis, PNG Tisa Asosiesen na Dipatmen bilong Pesonel Menesemen, dispela MOA i kamap, na nau ol tisa bai i stat wantaim K19,000 pe long wan wan yia.

Antap long dispela, olgeta tisa bai i gat helt na laip insurens na ol narapela alawens olsem rimot disabiliti alawens, domestik maket alawens, het tisa alawens, boding skul alawens, spesel tisa alawens, lip tiket na tu

nomol pasin bilong apim pe taim tisa i mekim gutpela wok, bai i kamap yet.

Papua Niugini i gat 48,800 tisa i stap na ol i bun baksait stret bilong developmen insait long kantri, na gavman bilong Peter O'Neill na Leo Dion i luk-save long dispela.

Tasol mausman bilong gavman long dispela taim bilong sainim agrimen, Vais Minista bilong edukesen, Gisuwat Mangere Siniwin i givim strongpela tok long ol tisa i mas mekim wok bilong ol gut long helpim ol pikinini na komyuniti. Em i tokim ol long no ken lusim klasrum na i go aut long taim bilong skul.

"Em i bikpela tingting bilong O'Neill-Dion gavman long putim Edukesen Developmen i go pas, tasol wantaim dispela gutpela prut yu kisim, tisa yu mas mekim wok bilong yu gut." Mista Siniwin i tok.



Polis Ripot

Polis arestim moa saspek long K6.3 milien roberi

NCD: Ol polis long Mosbi i holim tupela moa man na kisim bek K358,000 bilong dispela K6.3 milien ol stilman i bin stilim long Mosbi long begin bilong dispela mun. Ol polis i bin banisim tupela hap insait long siti na holim ol dispela man. Ol polis i kisim bek K1.2 milien pinis. Ol polis i bin banisim wanpela haus long Taurama na holim wanpela man wantaim bikpela mani na bihain ol i go long Konebada Pak na arestim wanpela moa man na kisim ol i go long Boroko Polis stesin Ol polis i holim 5-pela man na tupela meri na wok painimaut i go het yet. Bai ol i sasim ol neks wik. Ol polis i askim ol pablik long tok save sapos ol i save long ples ol stilman i wok long hait i stap.

Foapela man kamap long kot long kilim man

KOKOPO: Foapela man polis i sasim long kilim indai wanpela man bilong ples Talvat long Is Nu Briten, long mun Jun long dispela yia, bai kamap long kot long Fonde. Tupela bilong ol dispela man i gat narapela sas tu bilong kamapim bagarap long bodi bilong man. Polis i sasim ol dispela man bihain long indai bilong Erimia August. Polis ripot i tok ol i painim bodi bilong August long bikmoning long Jun 9. Em i dai na slip long rot na pastaim ol i ting wanpela kar i bamim em. Tasol bihain ol i lukim olsem sampela lain i katim op bel na kamautim na putim arere long bodi bilong em.

Gret 8 studen dai long pait namel long ol birua

ISTEN HAILANS: Wanpela gret 8 studen i dai bihain long ol birua i sutim em long Mande moning. Pait i kamap namel long ol Aseranka long Ayura veli na o lain Onamuna. Polis i tok dispela pait i bin stat las wik na studen ya, Luke Daporima, i namba sikis man long dai long dispela pait. Luke na narapela man i bilong lain Aseranka na foapela i bilong Onamuna.

Kar bamim man long Madang

Ol polis long Madang i holim draiva bilong wanpela ka bihain long em i bamim wanpela man. Polis ripot i tok draiva bilong kar i bin bamim wanpela PMV bas tasol em i ranawe na PMV draiva i raunim em. Dispela ka i spit i go na bamim wanpela man husat i wok long wok-about long rot wantaim meri na pikinini. Ol pablik i pulim draiva i kamaut long ka na paitim em tasol tupela polis opisa i kamap na sevim em. Ol i kisim em i go lokim long Yomba polis sel.

Katres kilim man na kamapim bagarap

JIWAKA: Wanpela man i dai na narapela i kisim bagarap long taim katres long gan bilong polis i paia. Dispela birua i bin kamap long Bans, long taim polis i traim long stopim ol spakman husat i no laik ol polis i arestim ol. Dispela hevi i kamap long Sarere. Ripot i tok ol polisman i kisim liklik bagarap long taim ol spakman i pait wantaim ol. Ol dispela spakman i bilong wanpela ples klotsu husat i save brukim lo long kisim fi long ol lain i kam salim kaikai long maket na long ol lain i wokim bisnis arere long rot.

Teksim Wari, Tingting, Painim Pren, Wantok o Pas bilong yu i kam nau.. Digicel namba: 7235 6149

Dia Edita, dispela em i kaikai bilong tingting tasol. Em i olsem, taim yu lukluk long laip bilong yu, yu bai lukim olsem graun i pas wantaim gutpela samting na i no gutpela samting. Long wanem samting yu lukim long nias, i lukim olsem devil o man nogut i wok long winim resis. Dispela pait namel bilong tupela i kamap bikpela na i kam stap namel long yumi na wantaim ol famili bilong yumi na i laik bagarapim sindaun bilong yumi. Tasol yu no ken pret, yu mas gat hop, yu ken lukluk sapos yu laik stap na pas wantaim devil/man nogut o stap wantaim Holi Spirit.

W. Kea
18/10/2013

Dia Wantok Niuspepa, mi wanpela eks seminarien bilong Muli viles long lalibu - Pangia ilektoret. Mi laik tok bikpela amamas i go long memba bilong mi na praim minista bilong PNG long silim rot i go olsem long lalibu na wara Yalo.

Albert Yuandi - Mapix mero.
25/10/2013

Sacred Heart Charity Society i laik askim long sampela helpim. Husat i gat lewa long wok Sariti em ken rait na kisim moa tok save. Em bisnis man, NGO, Institusen, Dipatmen bilong Helt, PNG gavman na ol arapela man long wol i gat lewa long sariti i ken rait na kisim moa tok save. Tenk yu.

Sacred Heart Charity Society,
Budum village.
20/10/2013

Dia Wantok Nius, mi Peter Junior na kismas bilong mi em 22. Mi singel man na mi laik painim wanpela meri long PNG long maritim na stap wantaim oltaim. Husat i gat laik i ken ringim mi long 7297 1752; ring long Fraide apinun. Tenk yu Wantok.

19/10/2013

Dia Wantok Niuspepa, mi wanpela rida bilong Wantok Niuspepa. Planti bilong PNG save ritim pidgin nias, mi laik yupela rait planti Wantok Niuspepa na salim aut long PNG. Tenk yu.

Hewa - Igini Max
16/10/2013

Wantok street agents!

Salim moa pepa na win olgeta wik!!

Sapos yu salim,



50 - 80 kopi -

1x Wantok T-slot

80 - 100 kopis -

1x Wantok Kep

101 - 150 -

Wantok Ambrela

151 - 200 -

Wantok Polo Siot

201 plus -

Wantok Polo Siot na Cap

Dispela promoten bai stap long Oktoba i go long Desemba 2013 tasol.

Salens long tisa perol

Frieda Sila Kana i raitim

SALENS i go long ol lain long perol sistem bilong Tising Sevis Komisn long ronim gut pe bilong ol tisa, na i noken mekim paul pasin.

Tommy Hecko, Jeneral Seketeri bilong PNG Tisa Asosiesen i Em i mekim dispela singaut long taim bilong sainim Memorandum bilong Agrimen (MOA) long senisim pe bilong ol tisa, namel

Em i singaut long tu long gavman long stretim ol lo bilong inkam takis, bai gutpela kaikai bilong dispela MOA i noken go bek long gavman wantaim kain kain takis ol tisa bai baim.

Mista Hecko i tok dispela MOA bilong apim ol pe na alawens bilong ol tisa bai stat long Janueri 1, 2014 na pinis long 31 Desemba 2016.

Em i makim ol tisa na i kisim ol salens gavman I tromoi long ol tisa long mekim gut wok bilong ol.

Em i tok tenkyu long gavman long luksave long hatwok bilong ol tisa na givim ol gutpela samting insait long dispela MOA.

"Mi luksave long planti stori nogut i stap long ol tisa i no mekim wok bilong ol, tasol mi laik tok tu olsem, mipela ol tisa em taim mipela i lusim koles na kisim wok, mipela i sanap long mipela yet.

I gat liklik lain tasol i no save mekim gut wok na i bagarapim nem bilong olgeta tisa," Mista Hecko i tok.

"Tasol mi laik tokim ol tisa olsem yumi mekim wok bilong planti lain. Yumi stap long dispela wol long kamap sevan o wokman, i no bilong ol man by wok long yumi. Dispela em i namba wan wok bilong opim na glasim tingting bilong man. Yumi gat bikpela wok.

Mista Hecko i tok tenkyu long ol fainensel memba bilong PNTA stat long 2003 i kam long 2013, na em i singaut strongtu long ol narapela tisa husat i no memba long PNG Tisa Asosiesen long ol i mas baim membasip bilong ol.



GOROKA SELEBRETIM WOL FUD DE: Taim ol arapela provins i bin selebretim Wol Fud De, Goroka long Isten Hailans tu i bin kamapim kala selebresen wantaim ol tumbuna singsing. Ol fama long Isten Hailans na Simbu tu i bin soim long publik ol kainkain kaikai na ol arapela samting ol i save kamapim. Poto i soim meri fama bilong Goroka, Lillian Rigo, i soim long publik ol Afrika yam.

Poto: Sape Metta



OL SOSPEN GRAUN: Nogut yu ting ol meri tasol i save wokim ol sospen graun. Dispela man Zumim i sindaun isi na soim pasin tumbuna bilong ol long wokim ol sospen graun na kundu long taim bilong Makham Banana Festival. *Poto Gedisa Jacob.*

grow business
Banking solution
for SMEs

Smart Business Package

- ✓ Smart Business Current Account
- ✓ Smart Business Deposit Account
- ✓ Smart Business Debit Card
- ✓ Mobile and Internet Banking

Plus Smart Business Loan

320 1212/ 7030 1212
 servicebsp@bsp.com.pg
 www.bsp.com.pg | f t



LUKLUK BEK LONG WIK:

MOSBI:
 STAT long tumora, Novemba 1, givim mekim save long salim, baim na kaikai buai long pablik ples long Mosbi siti bai stat. Na i gat lo pinis ol i kolim NCDC Betelnut Control Lo 2013 i tambu long salim na kaikai buai long pablik ples em Nesenel Kapitel Distrik Komisnin (NCDC) i tok orait long en. Long las wik Fraide, NCD Gavana na papa bilong laikim Mosbi siti i mas stap klin na helti, i bin holim wanpela bung na tok klia long ol samting i sut long dispela tambu bilong salim buai.

Aninit long nupela lo, ol lain i brukim tambu na karim, salim na kaikai buai na tu, tromoi pipia long buai na spet nabaut, tromoi na spetim buai long kar, bai kisim mekim save olsem: K300 fi long man i salim buai long pablik ples o sapos nogat, bai em i mekim namel long tupela aua komyuniti wok. Sasim K1,000 fi long papa bilong dingi, kanu, trak na kar i karim buai i kam insait long Mosbi siti, K9,500 long ol sip na balus i trenspotim ol buai bek i kisim ol buai i kam long Mosbi siti na sasim K5,000 i go long ol papa bilong komesel bilding i larim ol long salim o kaikai buai. Waigani Polis stesin em ples long siti ol bai lokim ol manmeri i brukim dispela buai lo na tu, ol viles kot mejistret baiharim kot. Sapos pablik i gat komplem long sampela samting long lo bilong buai orait, ringim hot-lain namba 76535735 0 7149614.

MOSBI:
 ANINIT long nupela lo bilong salim buai long Mosbi, ol i makim ol dispela ples olsem holsel buai maket, taim ol i bildim ol nupela buai maket long Laloki long Hiritano Haiwe na Raburogo long Magi Haiwe, Lareva maket long Hohola, Gerehu Stes 4 Posen 3112 na Hanuabada maket.

Ol narapela ples ol i ken salim buai long siti long riteil prais em long Lareva maket long Hohola, ol Nain na Sikis Mail maket, Gerehu Stes 4 Posen 3112, olpela Erima Somil, Tokarara, Sabama na Talai Goroba maket, ples Hanuabada na ol sampela setelmen. NCD Gavana, Powes Parkop i tok i tambu tru long salim buai long ol polis, koreksenel sevis na ami bareks.

KANTRI:
 PNG i winim ol narapela kantri long Pasifik long sik kensa, Helt Minista Michal Malabag, i tok. Na kantri i winim ol narapela kantri long wol long sik kensa bilong maus. Pasin bilong kaikai buai ol lapun, bikipela na liklik pikinini i mekim em i bikipela samting wok long kamapim dispela sik, Mista Malabag, i tok. Moa man i kisim sik kensa bilong maus tasol mak bilong ol meri i wok long go antap long wanem, moa meri i kaikai buai na smuk. Em i salim strongpela toktok long pablik long dispela kantri long tingim helt na gutpela pasin bikos i no gat gutpela kensa haus sik o ol kensa dokta long helpim ol.

Long wankain taim tu, speselis kensa dokta long Pot Mosbi Jenerel Haus sik dokta bilong tit, Dokta Matupi Apaio, i tok bikipela mak olsem 98 pesen bilong ol pipel i gat sik kensa bilong maus em ol lain i save kaikai buai.

MOSBI:
 POLIS i kisim pinis moa long K1 milien na tu, holim pasim sampela stilman na masta main i bin stilim moa long K6 milien bilong Maybank long Mosbi tripela wik i go pinis. Dispela em i bikipela mak long stilim mani long histori bilong PNG. Tupela sekyuriti gad wantaim bikipela intenesenal sekyuriti kampani G4S i bin go pas long stil pasin em Casper Louis na Paul Steven. Polis i holim ol pinis. Ol bin holim pasim Steven long ples Hisiu, Sentral provins na Louis long Hailans Haiwe taim em i wok long ranawe long Lae i go long Madang. Ol polis i wok yet long traim painim na holim ol.

Ol memba mas yusim DSIP long wok developmen

Stanley Nondol i raitim

HUSAT memba bilong Palamen i no yusim 2013 K10 milien bilong Distrik Sevis Impruvmen Projek (DSIP) na K5 milien bilong PSIP i mas yusim dispela mani hariari long wok developmen. Sapos ol i no yusim bai gavman i kisim bek na ol pipel i no inap kisim gutpela sevis bilong gavman.

Gavman i givim K10 milien long wan wan distrik na K5 milien long wan wan provins long 2013 baset. Tasol planti memba bilong Palamen i no mekim wok bilong stretim ol rot, bris, haus sik, skul, wara saplapi, na pawa long ilektoret bilong ol.

Bikipela populesen i stap long

ol ples we i no gat gutpela gavman sevis na ol i kisim taim bikos rot i nogut, bris i bagarap na ol no gat gutpela wara saplapi.

Dispela hevi stap yet long planti ples long kantri maski gavman i tokaut long bikipela bilien kina winmani kantri i kisim long ol kain samting olsem gol, kopa, wel na ges.

Minista bilong Fainens, James Marape i tok Fainens dipatmen i givim pinis namel long K5 milien na K7 milien long wan wan distrik memba na em i tok ol i mas yusim dispela mani long mekim wok na ol pipel bai kisim sevis.

Minista Marape i tok gavman bai baim balens long pinis bilong dispela yia.

I gat bikipela komplem i kamap olsem planti ol memba i

no mekim wok long mekim promis bilong praim minista i karim kaikai. Mista O'Neill i bin tok promis olsem 2013 em i yia bilong mekim wok na tokaut long bikipela milien long ol wok developmen.

Sampela memba bilong palamen i tok ol i no kisim inap mani. Ol i tok ol i wet yet long gavman i givim olgeta K10 milien na bai ol i mekim wok. Oli no mekim wok long sampela milien kina gavman i bin givim pinis na i stap nau akaun bilong distrik.

Minista Marape i tok sapos ol memba i no mekim wok long mani gavman i givim pinis na dispela yia piis bai gavman i kisim bek i kam long bikipela akuant long Waigani. Na sapos dispela mani stap yet long akun bai ol i no inap kisim long 2014

baset inap ol yusim ol mani we gavman i givim.

Minista Marape i tok klia olsem ol memba bilong Oposisen i kisim wankain mani olsem ol arapela memba i stap long gavman. Em i tok gavman i no wansait na tok ol tu mas mekim wok developmen long distrik na provins bilong ol.

Minista Marape i mekim dispela tok klia bihain long palnti komplem i kamap long ol memba bilong Oposisen na ol arapela olsem gavman i no giviim kwik developmen mani long ol memba na ol Oposisen i no kiism DSIP mani.

Minista Marape i tok gavman i givim isi isi long lukautim kes flo bilong gavman. Em i tok olgeta memba i kisim bikipela milien pinis na gavman bai baim balens klostu taim.

EU bai helpim PNG

Stanley Nondol i raitim

YUROPIEN Yunion (EU) na PNG i stap pren long wok developmen long planti yia na dispela wok poroman bai go het long strongim wok bung. PNG gavman i lukluk long kirapim moa wok divelpomen wantaim helpim bilong EU.

Minista bilong Nesenel Plening Charles Abel i tok EU i gat strongpela bilip long wok wantaim PNG gavman long planti yia. Em i tok gavman i redi long wok wantaim EU tu long strongim patna na developmen namel long tupela kantri.

Minista Abel i tok PNG i gat planti oil, ges, gol, na maining stap na tok gavman i wok hat long mekim bikipela developmen long kantri wantaim helpim bilong autsait bodi olsem EU.

Minista Abel i mekim dispela toktok long dispela wik long Pot Mosbi long wanpela kibung bilong EU long opim bilong nupela opis bilong EU long kantri.

Embeseda Martin Dihm i tok nupela opis long kantri i soim olsem EU na PNG i gat gutpela pren long wok developmen. Em i tok dispela patna long developmen bai go het long planti yia long ikam.

Dispela opis bai bai i gat EU benk bilong em.

Mista Dhim i tok EU bai surukim wok bilong em long PNG na dispela nupela oipis tu

Dr Gerhard Sa-hathil, EU Dairekta bilong Oceania Australia na Pasifik, Embeseda Martin Dihm (namel) wantaim Praim Minista na ol arapela delegets long EU bung.



Dr Gerhard Sa-hathil, EU Dairekta bilong Oceania Australia na Pasifik, i lukluk na Nesenel Plening minista Charles Abel i mekim toktok long kibung bilong EU.

makim olsem EU i ken apim mani helpim i go antap long helpim divelpmen bilong PNG. EU i gat 28 memba kantri na moa long 550 milien populesen. Minista Abel i tok EU i helpim PNG moa long K400m taim ol i statim opis long kantri sampela yia go pinis.

PNG Pawa i katim pawa long NCD

PNG Pawa i toksave long dispela wik olsem bai i gat ol blekaut insait long NCD na ol ples arere inap long tupela wik.

PNG Pawa bai katim pawa long sampela hap bilong siti na larim narapela hap i kisim pawa long sampela aua, na bihain wankain samting bai kamap

long narapela hap bilong siti gen.

Dispela hevi bilong katim pawa em i kamap bilong ges wanem san i hat tumas na mak bilong wara long Sirinum Dem i go daun na i no gat inap strong long karim wara long ranim ol 4-pela Rauna Haidro Pawa Stesin. Wanpela praivet

masin long Hanjung Pawa Stesin tu i bagarap na ol i wetim ol pat long kam na bai ol i stretim. I gat hevi tu long wanpela ges tebain bilong PNG Pawa long Kanudi Pawa Stesin.

Wok bilong brukim pawa bai i save kamap long 8 klok moning i go inap 4 klok long apinun inap long tupela wik. Ol niuspepa bai

i karim tok save bilong taim bilong katim pawa long ol NCD eria.

Ol kastoma husat i gat sten bai jenereta i mas yusim ol long taim bilong katim pawa. PNG Pawa i laik tok sori tru long wanem kain hevi ol pablik i bungim long taim bilong katim pawa.

Gutpela poro stret...

ISI isi, PNG i wok long luksave long ol enimal na moa yet, namba wan poroman bilong man, em dok.

Wantaim sapot bilong Westpac Benk, Royal Society for the Prevention of Cruelty to Animals (RSPCA) em ogenaisesen i save lukautim ol enimal na Nesanel Kapitel Distrik, PNG i bin holim namba wan enimal o Paws Wokabaut tupela wik i go pinis.

Petron bilong RSPCA, Gavana Jenerel Sir Michael Ogio, i bin askim olgeta pipel long dispela kantri long mekim gut long ol enimal na ol narapela pipel.

Sir Michael i bin tok ol risets i soim olsem i gat koneksen namel long pasin bilong vailens na mekim no gut long ol haus na komyuniti bilong yumi.

"Risets bilong wanpela profesia long Amerika i soim olsem i gat koneksen long mekim nogut long ol enimal na vailens long haus na pipel.

"Ol kain vailens olsem buling nap ait long skul eria, bagarapim ol pikinini long haus, man i paitim na mekim nogut meri na komyuniti i pait nabaut long ol neibahut i kamap tu long ol enimal," Sir Michael i tok long risets bilong bikman bilong

Amerika.

Sir Michael i strongim yumi olgeta long senisim pasin na mekim gut long ol narapela na ol enimal, promotim fridom na welfea olsem ol RSPCA i mekim long ol.

Em i tok tu olsem yumi mas skulim ol pikinini bilong yumi long mekim gutpela pasin long ol animal we bai larim ol i stap amamas na fr, na go planti long ol lain i kam bihain i ken gat sans long lukim ol (enimal).

Westpac Benk i wanpela long ol bikpela sponso long mekim gut long ol enimal wokabaut. Adam Downie em wanpela bikman bilong Westpac Benk i tok 15 volantia bilong benk i bin givim kaikai long 400 pipel i rijista long wokabaut na givim auto l bekepek na ol ambrela.

Em i tok Westpac Benk bai go het long sponsaim wokabaut long ol yia i kam.

Em i tok as tingting long Westpac i sapotim yet dispela kain samting em, "mipela i bilip long givim bek i go long ol komyuniti mipela i save wok long en. Sampela taim, mipela i givim kopret sapot, na long ol narapela taim, ol woklain i givim han na leva long ol komyuniti sevis".



GUTPELA PORO: Poto i soim Adam Downie na dog bilong em Max long Ela Bis taim ol bin pinisim wokabaut.

PNG nidim planti pawa saplai : Basil

DEPUTI oposisen lida Sam Basil i tok maski kantri i gat planti bikpela wara, ges na oil hevi bilong pawa o enejit sot i stap yet. Na singaut long gavman long mekim planti invesmen long pablik praiwet patnasip long kantri bai gat inap pawa saplai.

Mista Basil i mekim dispela toktok bihain long bikpela pawa blekaut i kamap long Lae, Mosbi na arapela senta long kantri, na ol bisnis haus na pipel i kisim taim.

Praim Minista, Peter O'Neill i sutim tok long PNG Pawa bosman, John Tangit wantaim menesmen i stap long ovasis na tok em bai mekim save long ol taim ol i kam bek long kantri.

Mista Basil i tok dispela raun bilong bot na

menesmen bilong PNG Pawa long ovasis i no wanpela hevi. Em i tok hevi i stap long gavman i mas putim moa mani long stretim pawa saplai long kantri.

Mista Basil i tok kantri i wok long salim bikpela ges, oil na ol samting i go autsait, tasol yumi gat bikpela nid stap yet.

Mista Basil i tok gavman i mas putim mani na kamapim pablik praiwet patnasip long ol distrik i mas kamapim hairdo bilong ol yet long kisim pawa saplai.

Mista Basil i tok ol jenereta we i save yusim disil tu mas baim inap saplai long yusim.

Mista Basil i tok sapos Praim Minista i rausim bos bilong PNG Pawa, John Tangim bai i no inap stretim wanpela hevi.

Em i tok kantri i gat planti bikpela riva inap long yumi ken bildim dam. Em i tok planti oil na ges i go aut long maket.

Mista Basil i tok bikpela blekaut long Yonki na Rouna em wanpela bikpela hevi tru we gavman nid long lukluk na putim bikpela mani long stretim.

Deputi oposisen lida i tok planti ol masin long pawa stesen olsem ttebain i bilong bipo na i no stap long gutpela mak na gavman mas putim mani na stretim kwik.

Mista Basil i tok yumi noken sutim tok long wok man bilong PNG Pawa tasol. Em i tok i em wok bilong gavman long mekim gutpela invesmen disisen long ronim gutpela pawa saplai long kantri.

Radho pikeri kisim K1m long NDB

Radho Pikeri long 15 mail, Sogeri rot autsait long Pot Mosbi bai wokim wanpela stok fid mil bilong ol yet bihain long ol i bin kisim wanpela dinau helpim long Nesanel Developmen Benk.

Papa bilong pikiri, Robert Rasaka i tok long taim em i kisim sek olsem em i gat bikpela amamas long Nesanel Developmen Benk long givim em dispela bikpela dinau long em i ken wokim wanpela fid mil long fam bilong em.

Mista Rasaka i tok taim em i statim bisnis 12 pela yia i go pinis i kam inap nau, dispela bisnis bilong em long lukautim na salim pik, em i bin yusim planti mani long baim stok fid na dispela i kirapim tingting long em yet i laik wokim wanpela mil. "Mi save yusim planti moni long baim na sipim stok fid long Lae kam long hia long wan wan mun. Taim mi wokim mill bilong mi yet mi ken sevim planti



(L-R) Kini Vali NDB Credit Menesa, Robert Rasaka, NDB Eksekutiv Menesa Lending Trevor Cain na Lons Opisa Edward Elliot long taim bilong givim sek mani long pikeri projek.

mani". Mista Rasaka i tok.

Mani mak bilong baim sip long Lae na Brisben i wankain na i antap tru tasol mi nogat narapela we long kisim stok fid olsem na mi wok long kisim yet long ol inap nau. Mista Raska i tok long wokim pikiri bisnis stok fid em i nambawan samting na nau em bai baim ol samting bilong wokim stok fid bilong em yet na tu bilong salim long ol arapela pikiri fama.

Em i bin statim dis-

pela pikiri bisnis 22pela krismas i go pinis wantaim 24 pela pik. Bisnis i kamap gut na nau em igat 6,000 pik long tupelo fam; Radho na Koita Oro Boroma em pikini bilong em i menesim. Mista Rasaka i nau salim 240 pik long wanwan wik long ol bikpela supra maket, hotel, haus kaikai na long pablik.

Mista Rasaka tu i bin lukim longpela na bihain taim bilong bisnis bilong em olsem na em i kisim wanpela Filipino

man husait i gat bikpela save long wok pikiri.

Taim bilong dispela Filipino i pinis na klostu em bai go bek, Mista Rasaka i kisim pinis wanpela man India long kisim ples bilong em na i tok, "Em i gutpela long kisim ol save man long ovasis i kam menesim bisnis bilong yumi tasol ol win mani i mas stap long kantri, yumi noken larim ol ausait lain i kam ronim bisnis na sipim olgeta mani i go aut long kantri".

Madang Papa Graun i wari long bai ileksen

OL TANFUN Papa Graun long Madang i wari long bai ileksen bilong Madang ilektoret i gat moa kenidet bilong Hailans, na em i laikim liektoral komisina na polis komisina long helpim.

Tallad Lucas em i siaman bilong Tanfun papa graun i tok i gat 18-pela kenidet i resis long Madang bai ileksen, tasol 9-pela olgeta i bilong Hailans provins.

Em i wari olsem nogut bai long taim bilong ileksen ol dispela 9-pela lain kisim ol lain bilong ol long ples i kam long tromoi ol giaman

vot na kain kain hevi i ken kamap.

"Olsem siaman bilong ol Papa-graun long Madang, mi wari long dispela samting na mi laikim ilektoral na polis komisina i mas was gut, na lukim ol lain i gat nem long komon rol tasol i putim vot bilong ol.

"Mi laikim tu ol mobail skwad i kam na was long dispela taim, bai nogat trabel i ken kamap," Mista Lucas i tok.

I gat 71,000 pipel long Madang olsem rekot bilong 2000 populesen sensus i tok. Namba bilong ol pipel

long distrik i karamapim tripela LLG, na 40,000 pipel em inap long vot. Tasol nau komon rol i no soim dispela namba bilong ol lain i ken vot.

"Bikpela wari bilong mi em, ol lain i no gat nem long komon rol bai misaut na ol lain i kam long ausait bai subim ol yet long yusim nem bilong ol lain i stap long komon rol long tromoi vot bilong ol," em i tok.

"I mas gat we bilong luksave long ol lain husat i laik putim vot bilong ol. Mipela laikim sapot bilong olgeta kenidet long mekim trupela

we tasol long dispela taim bilong poling. Gutpela nem bilong lida kenidet bai stap long pasin bilong ol sapota bilong ol," em i tok.

Long wankain taim, olupela Provinsel Edministreta bilong Madang, Clant Alok, na nau wanpela kenidet bilong Madang bai ileksen i tok ripot l bin kamap long niuspepa olsem em i sapotim pas-taim memba, Nixon Duban, l no tru.

"Mi laik tok olsem wanem samting i kamap long niuspepa i no tru. Mi no sapotim Mista Duban, na mi

no bin go stap long wanpela politikel reli bilong em. Mi laik tokim olupela memba na ol sapota bilong em long no ken mekim kain kain toktok nabaut.

Dispela ileksen i mas toktok long ol gutpela developmen bilong stretim sindaun bilong ol pipel. i no long bagarapim ol narapela kenidet," Mista Alok i tok.

"Las tru, mi laik toksave long ol vota bilong Madang long putim vot bilong yu na yusim dispela bai ileksen long makim ol trupela lida bilong yu," Em i tok.

Banana festival bilong ol Makham

Gedisa Jacob i raitim

i gat kain kain ol retpela banana, *jirab*.

OLGETA ples long PNG i gat nem long groim ol kain kain kaikai. Ol pipel bilong Makham long Morobe provins tu i gat nem long planim kain kain banana.

Olgeta yia i gat wanpela spesel festival i save kamap we ol i soim kain kain tumbuna kaikai bilong Makham Distrik na namba wan kaikai bilong ol, banana.

Long dispela yia, dispela spesel so bilong soim ol tumbuna kaikai i bin kamap long Septemba 15, 16 na 17 long taim bilong amamasim tu Independens de bilong PNG.

Wanpela bikpela mak bilong amamasin dispela festival em pasin bilong lainim ol banana i go antap inap i kamap olsem liklik maunten. Long tok ples ol i tok *tzitzi*. Ol banana tu i gat nem bilong ol yet.

I gat kain kain ol sotpela waitpela banana, marafri, na

Long taim bilong amamasim dispela festival, i bin gat 15 singsing grup bilong distrik i kamap na singsing. Ol lain bilong Mayamjariang, Wantoat, Zumangurun na Zumim em sampela bilong ol.

Na ol lain bilong wokim sospen graun tu i soim pasin bilong ol long wokim sospen graun. Ol i soim kain kain sospen graun na kukim kaikai tu long ol dispela sospen.

Ol man i soim pasin tumbuna long wokim katapel, wokim paia, wokim bilum, yusim ston na mambu naip bilong ol tumbuna. Ol manmeri bilong narapela ples husat i kamap na lukim dispela pasin tumbuna bilong ol Makham i ai op na amamas long lukim olsem ol i holim strong yet pasin tumbuna bilong ol.

Dispela banana festival bai kamap gen long neks yia, long Desemba 2, 3 na 4.



Ol banana i hangamap long *tzitzi*. *Poto: Gedisa Jacob*

Baton bilong Kwin i kisim PNG

I GAT 4-pela de moa i stap long PNG bai lukim baton bilong Kwin i kam kamap.

Glasgow 2014 Kwin Baton (tos) Rile bai kamap long Papua Niugini long Novemba 5 na bai i gat singsing amamas wantaim inap long tupela de. Ran bilong baton bai i stat long Pot Mosbi long Novemba 5 na i go olsem long Kavieng long Novemba 6, olsem namba tu hap bilong wakabout bilong en.

Pot Mosbi i bin lukim pinis wanpela ron bilong baton bilong Kwin bipo tasol nau bai namba wan taim bilong kamap long Kavieng. Nu Ailan Provinsal Gavman na ol pipel i amamas na wetim taim bilong baton bilong Kwin bai kamap long ples bilong ol.

Em i gutpela taim bilong ol long soim ol pasin kalsa na sindaun bilong ol na ol bai yusim planti pipel bilong ol long ron wantaim baton bilong Kwin. Planti narapela spot na ol kalsa samting bai i kamap wantaim ol skul sumatin na ol singsing grup bilong ol ples. Bek paip ben bilong ol woda tu bai i soim stail bilong ol.

Gavana bilong Nu Ailan, Sir Julius Chan i tok, em i amamas tru long ol i givim luksave long Kavieng bai go pas long Glasgow 2014 Baton bilong Kwin Rile, bi-

long wanem em i givim em sans long kamapim nem bilong provins bilong em.

Ol i redi pinis na ol i bilip moa long 300 manmeri na pikinini bai i mekim sampela samting long kamap hap bilong dispela baton rile.

Tamzin Wardley, meri i go pas long PNG Kwin Baton Rile i tok, "Baton bilong Kwin Rile i givim sans long olgeta lain i ken serim amamas bilong kaunim ol de long Skotlandan bai holim bikpela spot na kalsa festival, em Glasgow 2014 Komonwelt Gems."

"Mipela i redi long soim stail bilong ol pikinini bilong Pot Mosbi na naispela taun na ol pipel bilong Kavieng. Olsem na mipela i laik askim planti lain insait long dispela tupela ples long kam insait long singaut amamas long ol lain i karim baton na i ran. Mekim dispela taim i kamap wanpela gutpela taim tru bilong soim kala bilong yumi PNG," Ms Wardley i tok.

Ron bilong baton long Pot Mosbi na Kavieng bai kamaut long nius taim em i redi.

Bai i gat wanpela Kopret Befut Baul de salens i kamap long Pot Mosbi long Novemba 7 long kisim sampela mani bilong sapatim Tim PNG i go long 2014 Komonwelt Gems long Glasgow.

JOIN US AND CELEBRATE OUR 40 YEARS AT THE

AIR NIUGINI OPEN DAY

02 November 2013, 10am to 4pm at Gateway Hotel

HIGHLIGHTS OF OUR OPEN DAY

- Duty Free • Air Niugini merchandise • Career Information - Pilot Training / Engineering Cadetship / Cabin Crew / Graduate Cadet Program
- International Partners - Boeing / Fokker / Bombardier / Hawker Pacific / ATR / Icelandair

Come along and celebrate our 40th Anniversary with us! Learn about the airline, career opportunities, our partners and enjoy some exotic international Icelandic cuisine!

Air Niugini 40 YEARS

Ramu NiCo bringim nupela pes bas long rot

James G Kila i raitim

PLANTI manmeri long Madang taun na ol ples arere long rot long Madang Ramu Haiwe i lukim pinis na mangal stret na save singaut amamas taim ol nupela pes bas bilong Ramu NiCo i kukim long rot i kam.

Pes bilong ol dispela nupela kain bas wantaim grei kala em narakain bikos em ol nupela model i kam long Saina stret. Ol arrapela taun long PNG i no gat kain model bas i ron long rot.

Trenspot supavaisa long KBK Main, Lee Issac i tok Ramu NiCo i bringim 5-pela long ol dispela Dongfeng model bas i kam insait long kantri long helpim wok bilong trenspot long KBK Main.

Nau yet ol dispela bas i save bringim ol wokman bilong Ramu NiCo long KBK Main i go kam long



Trenspot supavaisa long KBK, Lee Issac sanap fran long tupela nupela Dongfeng model bas long KBK.

Madang taim ol i go malolo.

Ol dispela bas i luk wankein olsem trup keria bilong ami bilong woa. Pplanti lain long Madang rot i save mangal stret long lukim ol i

ran long rot na kukim i go kam wantaim stail stret.

Wanpela lokal bas draiva bilong Madang, Liken Nagide long rut 5A, i tok dispela ol Dongfeng model

bas em bilong Saina stret na bikos Ramu Projek em bilong Saina, ol i bringim i kam long kamapim sampela kala na tu soim teknoloji bilong Saina long Madang

Mista Issac i tok nau yet long KBK Main i gat 5-pela Dongfeng model bas i wok i stap. Wanpela ol i save yusim olsem sevis bas na arapela 4-pela em ol yusim long sait long trenpot bilong ol wokman.

Mista Issac i tok 4-pela long ol dispela bas em ol 4-wil draiv na wanpela em 6-wil. Ol dispela 4-wil draiv bas i ken karim 30 pasindia na 6-wil i ken karim 35 pasindia.

Em i tok klia tu olsem ol dispela faivpela Dongfeng model trenspot bas i gat ol draiva em yet i makim na ol i save gut long draivim ol dispela bas.

Ol faivpela stail draiva husat i save draivim ol dispela Dongfeng model bas i go kam long Madang taun em Mails Aimai, Shulz Giliab, Dangen Solokai, 'Mam' Bill Sesum na Basak Amari.

Ol dispela draiva i gat stail na marasin bilong ol yet long givim kala long bas tu long mekim ol manmeri na ol plawa sait long rot i kisim filings stret taim ol i draiv i kam na pairapim hon bilong bas.

Ramu NiCo i gat ol arapela bikpela bas we i save ran long rot long Basamuk tu i stap ol i kolim Yutong na i bikpela moa. Dispela ol bas em yu no inap painim long arapela taun long PNG. Ol i stap tasol long Madang.

Kaunim namba long Gapapaiwa

SIL Ukarumpa raita

TAIM wanpela man o meri i laik lainim nupela tok ples, em i save lainim long kaunim namba pastaim. Taim Ed na Catherine McGuckin i stat long tanim tok ples bilong Gapapaiwa, tupela i lainim pastaim ol Gapapaiwa namba.

Sapos yu laik save long mining bilong narapela namba, namba 6 long Gapapaiwa em wanem? Em bai yu tok olsem, 'wanpela han pinis na wanpela moa'. Namba 6 long Gapapaiwa em 'mikovi ma sago'.

Nau bai yumi go insait moa na askim. Yu ken save wanem namba 9 long Gapapaiwa tok ples? Ansa em, mikovi ma ruwa ma ruwa.

Namba 10? Em i isi. Ansa em 'ima ruwa' em i min olsem tupela han.

Namba 15 em i tok, 'ima ruwa ikovi ma kaena i olsem, tupela han pinis na wanpela lek. Ol namba long Gapapaiwa em: 1 em sago, 2 em ruwa, 3 em aroba, 4 em ruwa ma ruwa (2 na 2), 5 em miikovi (em i

min han pinis).

Namba 18 ansa bilong em, ima ruwa ikovi ma kaena sago ma aroba. Tasol 20 em i olsem 10 i isi long kolim. Ansa em tomowa sago (wanpela man). Long go het long kaunim ol namba, yu putim ol liklik namba i go wantaim ol namba twenti (20). Tasol yumi bai stop long hia.

Taim ol lain bilong tanim tok ples long Gapapaiwa, long Milen Be Provins i bung long ples long lukluk long Nupela Testamen, Matyiu i raitim,

long Matyu

14:21, ol i ritim, "Ma nani korotona kamonai to motomowa kava ivi yavisi na 5 tausen na 5. Long tanim stret mining em ol i tok, "Na insait long olgeta lain i stap, ol i kaunim ol man tasol inap long 5 tausen. Long Gapapaiwa ol i kisim tasol tok 'tausen' na yusim.

Wanpela lapun man i no wanbel long ol i kolim namba long Tok Inglis olsem tausen. Olsem na mipela i askim em, long em yet i ting wanem long tok ples.

Vailala Elementri Skul kisim nupela klasrum

DIGICEL Faundesen i opim gen narapela elementri skul dabol klasrum long Kikori Distrik, Galp Provins.

Vailala Elementri Skul projek i kisim K250,000 long Digicel Faundesen, long kirapim dispela dabol klasrum i no long taim i go pinis.

Vailala em i namba wan elementri skul insait long Kikori Distrik na namba 4 edukesen projek bilong Galp Provins we Digicel Faundesen i kamapim.

Wankain olsem ol narapela Digicel Faundesen projek, Vailala skul tu i kisim wanpela dabol klasrum haus wantaim 20 des na wanpela 3000 litra wara tenk na tupela VIP toilet.

Dispela klasrum i mekim 314 klasrum nau we Digicel Faundesen i wokim stat long 2008 i kam, na ol projek i stap long olgeta 22 provins bilong PNG. Samting olsem 6,000 pikinini i kisim gupelaples bilong lainim samting, wantaim helpim bilong Digicel.



Ol sumatin sindaun insait long nupela klasrum.

Poto: Digicel

Digicel Faundesen Projek Menesa, Haro Gomara i bin go long taim bilongopim ol dispela klasrum na i stap wantaim ol sumatin, tisa na ol papamama.

Sif Eksekutiv Opisa bilong Digicel Faundesen, Beatrice

Mahuru, i tok tenkyu long Vailala komyuniti long strongpela sapot bilong ol long dispela projek.

"Tenkyu bilong mi long Vailala komyuniti i bikpela tru long patnasip bilong ol long dispela projek. Ol i

givim ol dingi bilong ol wantaim ol sempion man long ronim bot long karim ol samting bilong wokim klasrum i go antap long strongpela solwara bilong Coral Sea na i go antap long wara.

Wantaim kain strongpela komyuniti sapot, skul bai i stap longpela taim bihain long mipela lusim na long kirapim narapela projek gen. Mi laik askim komyuniti bilong Vailala long lukautim gut skul na olgeta taim putim ol pikinini long skul, na kamapim strongpela komyuniti i save helpim ol yet, long bihaintaim."

Digicel Faundesen i helpim pinis 286 komyuniti bes projek wantaim mani inap long mak bilong K22.88 milien insait long 22 provins na i senisim laip bilong 250,000 pipel. Digicel Faundesen i gat plen long sapotim yet ol komyuniti projek long kisim namba wan edukesen na helt sevis na mekim ol komyuniti i sanap long lek bilong ol.



Kaunim han na lek long kolim namba long Gapapaiwa tok ples.

ol i bungim bikpela taim long raitim ol namba. Wok blong ol em long kisim tingting bilong ol pipel long ples husat i no stap insait long raitim buk. Taim ol i ritim stori bilong Jisas i givim kaikai long 5,000 manmeri insait

Em i stat long kolim namba 5,000 long tumbuna stail, tasol em i paul long kolim longpela namba na em i lusim. Olsem na ol tim bilong tanim tok i lusim olsem 'tausen.'

Sampela taim, wok bilong tanim tok ples em i olsem

yu laik painim mining bilong wanpela tok piksa. Tasol i save gat bikpela amamas i kamap taim, ol inap long painim aut ansa bilong tok piksa. Ol pipel i save wanbel long wanem we ol i laik kolim na bihain ol i save go het moa long tanim tok i go.

AGRICULTURE TRACTORS

90hp

70hp

50hp

*Photo for illustration purposes only

- Slashers
- Disc Ploughs
- Disc Harrows
- Post Hole Augers
- And Other Attachments for Farming

AGMARK

MACHINERY

PORT MORESBY: 323 7957 | Digicel: 7215 0333 / 7217 9815
 LAE: 472 6324 KOKOPO: 982 8748 | email: machinery@agmark.com.pg

Famili Tri Stua long Wewak

FAMILI Tri Stua, em i wanpela stua long Wewak we ol i save salim ol samting bilong redim bodi bilong ol lain i dai, long wanpela hap tasol.

Dispela bisnis i bilong Patricia Failou. Dispela meri husat i bin kirapim dispela bisnis wantaim dinau mani em i kisim long Nesanel Developmen Benk. Em i no bin tingting olsem nau bai em i gat wanpela gutpela bisnis em yet i lukautim na ranim. Dispela bisnis i kamap wan stop stua bilong painim ol samting bilong bilasim kofin bilong wantok na famili dai.

Dispela stua em i stap insait long wanpela olupela haus kapa long Caltex Bisnis Promosen Senta, bilong Dipatmen bilong Komes long Is Sepik Provins. Ausait em bai yu ting wanpela haus kapa nating. Tasol sapos yu go insait, bai yu kirap nogut long lukim naispela stail i stap. Olgeta samting olsem kofin bokis, retpela laplap i gat diwai kruse, ol kain kain stail flawa bilong matmat, na planti moa samting yu nidim em i stap long dispela stua.

Ol dispela stail i kam long tingting mama bilong stua, Misis Patricia Failou. Em i apim nem bilong Des bilong Meri long Bisnis wantaim Nesanel Developmen Benk long mekim driman bilong em i karim kaikai.

Patricia i kisim K20,000 dinau mani long NDB na kirapim dispela



L-R) NDB's Wimen in Bisnis Memesa Janet Kaule na Misis Patricia Failou sanap wantaim olgeta samting Famili Tri Stua i save salim.

bisnis taim em i pinisim gut tupela olupela dinau bilong em.

Pastaim dinau em i kisim, em long kirapim kakao fementri na long baim wet bin, draim na salim, wantaim wanpela dam trak bilong helpim bisnis.

Rilesensip Menesa bilong Meri long Bisnis insait long NDB, Janet Kaule, i amamas tru long taim em i go lukim Misis Failou na ol narapela bisnis kastoma long Wewak.

Em i amamas long lukim naispela insait bilong Famili Tri Stua na pasin Misis Failou i bihainim long lukautim gut bisnis bilong em. Em i tok Benk i gat bikpela tingting long

givim aut ol dinau mani bilong strongim ol meri i laik ranim liklik bisnis.

"NDB i helpim Misis Failou long kamapim gut bisnis long laik bilong em yet, tripela taim. Olsem na mi laik strongim ol meri long i go long NDB brens klostu long ol na yusim mani i stap long kamapim na groim bisnis bilong ol. I gat dinau mani mekpas bilong Kirapim na Groim bisnis i stap long ol i ken kisim wantaim 6.5 pesen intres tasol," Misis Kaule i tok.

Famili Tri Stua i save wokim na salim ol plawa bilong kofin, sampela swit smel sanda, marasin bi-

long kofin, bilasim ol kofin, bilasim hul bilong matmat na tu long stretim ol plawa bilong ol bikpela taim bilong amamas.

Ol plawa bilong kofin em ol i save wokim hat singel na dabol, ring singel na dabol, kruse, plawa bilong bilasim kofin na matmat. Ol i wokim tu ol plawa bilong wedding na ol narapela lain olsem Air Niugini i save baim tu bilong putim long Paradais Lons, na Is Sepik Provincial Gavman i save baim long putim long opis bilong ol.

Ol plastik plawa i save kam stret long Saina, na ol plawa tru em ol meri long ples i save groim na salim long Patricia. Em i save baim sampela long okit plawa gaden long Angoram na Maprik, bilong strongim plawa fam bilong ol meri long ples.

Patricia i helpim ol mama wantaim sit na ol stik bilong plawa na taim ol plawa i redi, em yet i save go na baim gen long ol.

"Mi laik helpim ol dispela meri long kisim sampela mani. Mi yet em mi no wari tumas sapos mi kisim liklik profit tasol," em i tok.

Famili Tri stua i save baim ol kofin bokis long ol Wirui Brothers long Wewak na ol wokmeri i save bilasim. Insait long kofin i save gat 12-pela liklik het pilo, blanket, o sitbet na putim ol strongpela marasin bilong holim bodi i stap longpela taim. Bikpela pikinini man, Bradley Failou, wanpela sumatin i wokim

Honas program long Kemistri long Yunivesiti i save helpim mama bilong em long miksim ol marasin bilong holim bodi.

"Ol lain bilong Papua Niugini i save mekim olgeta samting long las minit. Olsem na ol i save lusim tingting long planti samting. Mi laik helpim ol, olsem na mi putim olgeta samting ol i ken kisim," Patricia i tok.

I gat kofin bilong ol bebi na i go long ol bikpela man na meri, na kain kain mani mak bilong lain i gat liklik mani na ol lain i gat bikpela mani tu. Sampela lain long Rabaul, Madang, Manus na Pot Mosbi i baim pinis kofin nating wantaim bilas.

Famili Tri Stua i bin mekim ol plawa bilong ol bikpela kibung long taim bilong soim ol kala bilong yunipom bilong ol ami soldia long taim Gavana Jeneral i bin go long Moem Bareks, na tu ol i bin redim Remembrens De plawa bilong Gren Sif, Sir Michael Somare long Moem Bareks.

Patricia i lainim 8-pela meri long katim ol frem bilong poto, samapim ol bilas bilong plawa na long bilasim ol kofin bokis, tasol long save bilong ol yet tu ol i kamapim kain kain stail yet.

Patricia i amamas long stua bilong em i givim gutpela sevis long ol pipel bilong Is Sepik, na em i laik i go tu long Wes Sepik na long ol narapela hap bilong kantri.

Ol Ritel Outlet lain!
Salim moa pepa na win olgeta wik!!

Ol Kep

Sapos yu salim,

Ol bilak Kola siot

Ol marun Kola siot

Ol blu Kola siot

Ol Ambrela

Sapos yu salim olgeta Wantok Niuspepa insait long stua o outlet bilong yu, bai yu gat sans long winim ol dispela promosen klos bilong Wantok Niuspepa!
Dispela promosen bai stap long Oktoba i go long Desemba 2013 tasol.



New Crest Mining tim bilong ol meri. Foto: James Kila

Ol meri long main tu i ken sevim laip

POTO ya i soim ol strongpela meri bilong Newcrest Maining Kampani long Lihir i putim ol Imejensi Reskiu Tim (ERT) yunifom bilong ol na redi long soim ol stail bilong ol long sevim lain i bungim birua.

Dispela meri tim bilong New-

crest i bin stap insait long Apex Nesanel Maining Sefti Salens we olgeta maining kampani long PNG i salim ol tim long resis long ol rot na pasin bilong daunim birua.

Newcrest tim bilong Lihir i gat ol meri tasol i stap long dispela

resis i kamap long Mosbi. Planti lain i mangalim stret long stail bilong ol dispela meri tim bilong Newcrest.

- James Kila i raitim

Buai i ken kamapim kensa long maus

LONG strongim lo bilong salim buai insait long Nesenel Kepital Distrik, Helt Dipatmen i kamapim wangepela de bilong tokaut long ol birua i save kamap long pasin bilong kaikai buai, long Fraide 25 Oktoba long Tabari Ples long Boroko.

Minista bilong Helt na HIV/AIDS na memba bilong Pot Mosbi Not Wes i no bin kamap long dispela taim tasol em i bin larim Seketeri bilong Helt, Pascoe Kase long autim toktok bilong em.

"Yumi olgeta i save laikim buai long kain kain astingting. Tasol mi, olsem Minista i lukautim Helt bilong yupela, mi gat bikipela wari tru long wanem samting, pasin bilong kaikai buai i ken kamapim long helt bilong yupela na tu long bagarap i kamap long ples bilong yumi.

I gat taim bilong kaikai buai insait long Papua Niugini kalsa bilong yumi. Tasol Papua Niugini i gat bikipela namba long wol long ol lain i kisim kensa o sua long maus. Mi tingting strong tru olsem, dispela em i kamap long ol manmeri i kaikai buai tumas. Olgeta hap kona, yangpela na lapun i kaikai



Ol man i bung long Tabari Ples long harim ol bikman bilong helt i toktok long birua bilong kensa taim yu kaikai buai tumas

buai tumas.

Yumi ken stopim kensa sapos yumi stopim pasin bilong kaikai buai tumas. Bilong wanem, long dispela taim yumi no gat ol gutpela sekap na marasin na dokta bilong stretim sik kensa, olsem na yumi mas was gut long ol kain pasin

olsem i nap long kilim yumi yet.

Yumi lukim planti liklik mangi tumas i wok long kaikai buai. Dispela i no gutpela long helt bilong yupela. Moa long 90 pesen bilong ol sik lain long Pot Mosbi wantaim kensa long maus i gat stori bilong kaikai buai.

Ples yumi stap long em tu i mas stap klin bai i no ken bringim sik i kam long yumi. Em bai daunim sans bilong yumi no ken kisim sik malaria bilong wanem ol skin buai i save pasim ol baret na wara i save stop na i kamapim ples bilong ol natnat i kamap bikipela.

Olgeta lida bilong Papua Niugini i ken strongim tingting na pasin bilong stap long gutpela klinpela ples bilong soim olsem PNG i bihainim lo bilong 'Helti Ailan' insait long ol komyuniti bilong yumi.

Em i gutpela long stap helti na yumi mas tingting tude long bihainim stretpela pasin na 'Stop long kaikai buai,' Mista Malabag i tok.

Long wankain taim, Dokta Matupi Apaio, Sif Dental Sejen long kantri, na Wol Helt Ogenaisesen Kantri Representativ, Doka William Adu-Krow tu i bin mekim sampela toktok long strongim dispela.

Dokta Matupi Apaio i givim ol namba bilong sik maus kensa olsem: 98 pesen bilong kensa long maus em ol lain i save kaikai buai; 65 pesen sik em ol i bagarap olgeta na klostu 50 pesen bilong dispela sik lain i ken dai.

"I gat ol lain i save orait long sik tasol, sik i save kam bek gen. Dispela namba tu i wok long go antap bilong wanem i no gat gutpela sistem yet long luksave na menesim dispela. Save man bilong stretim ol dispela kain sik i sot long kantri.

Namba bilong ol lain i dai long kensa i bikipela tasol, planti taim ol lain i kisim marasin na helpim na lusim haus sik i go, ol i no save go bek gen long sekim ol. Planti bilong ol sik i save kam long ol liklik haus sik em ol sik kensa. Na 80 pesen bilong ol dispela lain em sik i winim pinis na old okta I no inap long stretim. Kaikai buai em i as tru bilong sik kensa long maus insait long PNG.

Dokta William Adu-Krow i tok tu olsem PNG i go pas tru long Pasifik long kensa long maus na nek. Namba bilong ol man i moa long ol meri, tasol i luk olsem ol meri tu i wok long kam antap bilong wanem ol meri i wok long kaikai buai na smok moa yet nau.

Ol pikinini husat i lain long kaikai buai nau i ken kamapim sik kensa taim ol i winim 25 krismas," em i tok.

Nupela plen bilong Helt Dipatmen



Helt Seketeri Pascoe Kase i holim helt plen wantaim Minista Malabag.

Nesenel Helt Dipatmen na Ministri bilong Helt i lonsim pinis nupela nesenel helt plen bilong 2013-2015.

Minista bilong Helt, na HIV/AIDS, Michael Malabag i bin lonsim dispela nupela plen long las wik long Fraide 18 Oktoba insait long Helt Opis long Pot Mosbi.

"Gavman bilong mi i gat strongpela bilip long bringim gutpela helt sevis i nap long ol lain i ken kisim helpim isi. Ol lain i no gat mani i save kisim bikipela bagarap taim ol sevis i no stap long mak bilong mani bilong ol. Ol et pos i mas op na stap, ol marasin i mas redi na i go long ol haus sik hariap na tu ol i mas stretim haus sik," Mista Malabag i tok.

Gavman i tok orait pinis long Fri Praimeri Helt Ke na helpim bilong kisim Speselis Helt Ke na ol helt atoriti i mas bihainim dispela nau. Dispela polisi em bilong helpim ol lain i no gat inap mani long kisim marasin, bihainim tingting insait long Nesenel Helt Plen 2011-2020.

"Mi salensim yupela nau long yusim ol samting i stap long helpim yupela long bringim gutpela sevis long ol pipel na sevim planti laip long narapela tripela yia i kam," Mista Malabag i tok.

Seketeri bilong Helt, Pascoe Kase i tok long taim bilong lonsim helt plen, olsem em i bikipela samting long luksave long wok bilong Helt Dipatmen long givim klia toktok long ronim wok insait long kantri. Bilong wanem olgeta han bilong gavman i save gat het pen bilong ol yet long ranim wok.

Mista Kase i tok olsem nupela NDOH Koporet Plen bilong 2012-2013 i makim nupela lukluk na mak bilong wok long gavanens na lidasip bilong helt sevis.

Long namba wan taim, dispela plen bai i strongim ol lo bilong wok em ol bos bilong dipatmen na ol menesa bilong ol program long ol i ken mekim ol wok plen i kamap isi long ol wok lain i ken bihainim na wok gut.

Insait long plen bai dipatmen i lukluk long ol dispela bikipela tingting bilong wok; Fri Praimeri Helt Ke na helpim long speselis ke; Senisim stail bilong helt menesmen na kamapim ol helt atoriti long kamapim gut gavanens na sevis deliveri long provinsal level; Kamapim gutpela rot bilong salim ol medikal saplai i go aut; Strongim ol sapot bilong Sios Helt Sevis; Kamapim na bihainim Helt Wokfos plen na; Kamapim gut ol helt infrastraksa.

"Mi laik tok strong long yumi olgeta i mas soim gutpela pasin bilong wok olsem ol pablik sevan aninit long tok, 'Profesenesilis, Loalti na moral karis, long mekim ol wok,'" Mista Kase i tok.

"Yumi mas wok olsem wangepela tim long kamapim dispela plen. Mi gat strongpela bilip olsem ol senia eksekutiv na ol dipatmen menesa na i go daun long olgeta wok lain bai kisim dispela plen na ran wantaim," em i tok.

Wantok Niuspepa Ritel Stua Krismas Promosen Winas bilong Dispela wik!!

1. Jmart Supermaket - Erima
2. KR Supermaket - Boroko
3. Stop N Shop- Central Waigani
4. Kwikshop - Tokarara
5. Kwikshop - Hohola Drive
6. Waterfront Foodworld Supermaket

Bai mipela dropim ol prais bilong yupela long dispela wik!

Alesco Perol Sistem (APS) bai helpim ol tisa long Simbu

DIVISEN bilong Edukesen insait long Simbu Provins i kamap namba 11 provinsal divisen bilong edukesen long kisim nupela Alesco Perol sistem stat long dispela mun.

Dispela sistem bai helpim ol rekot stori bilong 2891 tisa insait long provins long stap stret long provins na bai mekim isi long ol i kisim pe long taim stret.

Dipatmen bilong Edukesen long i bin traim aut APS long 1997 taim Dipatmen bilong Edukesen i bin salim ol profesenal fail bilong ol tisa i go long provins na ol i putim long ol fail long provins. Tasol bihain ol i save salim ol kopi bi-

long rekot i go bek long het opis long Waigani. Tasol nau ol i gat APS long provins na bai i gat senis i kamap.

Olgeta rekot bai i stap tasol long provins na mekim isi long ranim perol bilong ol tisa.

Provinsal Edukesen Edvaise, Walkaima Essy, i tok tenkyu long Dipatmen bilong Edukesen long bringim APS i kam insait long provins.

Em i tokaut olsem, em i wangepela laki man tru long stap laip yet na lukim dispela Alesco Perol Sistem i kamap insait long provins long dispela mun.


Em i save wari long ol tisa long Simbu Provins i no save

kisim pe bilong ol gut long taim stret, na long planti taim bilong kibung bilong dipatmen em i save toktok long ol i stretim perol bilong provins.

Em i givim toksave lukaut long ol 6-pela wok lain bilong staf salari seksen long Simbu long ol i mas yusim dispela sistem long mekim pe bilong ol tisa, na ol i no ken mekim kranki.

Mista Essy i tok strong long ol tisa olsem ol i mas stap insait long klasrum long taim bilong wok, na skulim gut ol sumatin. Ol i no ken lusim skul nating. Sapos ol i no stap long skul, opis bilong em i ken rausim pe bilong ol.

Polan Embaseda bai sapatim strong ol wok misineri



Riyunien

Mi bin lusim Pot Mosbi long de 14 Oktoba 2013. Mi kalap long Air Niugini balus i go long Bali na pundaun long Ngurarai Intenesenel ples balus long Denpasar, Bali Indonesia. Mi no inap kisim balus stret na go long Jakarta bikos taim Air Niugini i pundaun long Bali pinis na olgeta balus i go pinis long Jakarta. Olsem na mi stap wanpela nait long haus bilong ol Sista Mater Dolorosa i stap klostu long ples balus. Long moning, tudak i karamapim Denpasar yet, mi kalap long namba wan balus i go long Jakarta na joinim olgeta klasmeit bilong mi i bin bung pinis long Klender, Is Jakarta.

Ritrit bilong mipela em i olsem wanpela preparesen bilong selebretim Silva Jubili, 25 krismas bilong mipela i kamap pater neks yia 2014. I gat tupela pater i bin go pas long serim bilong ol long helpim mipela long lukluk bek wok pater bilong mipela.

Bihain, wan wan bilong mipela tu i serim eksperiens bilong wok Pater bilong mipela wan wan. I gat 22 i bin kisim Ordo kamap Pater long yia 1989. Foapela i dai pinis; wanpela i lusim wok Pater; na 5-pela i no bin kam long ritrit bilong mipela. Olsem na i gat 12-pela pater tasol i bin kamap long ritrit; 5-pela Daiosisan pris na 7-pela bilong lain SVD.

Taim wan wan bilong mipela i wokim sering, mipela i painimaut olsem mipela olgeta i bin bungim Gutpela taim na Taim nogut long mekim wok pater. Gutpela taim na taim nogut mipela i bungim long han bilong manmeri long peris o long wok ples bilong mipela. Tasol planti bilong mipela tu i bin bungim bikpela hevi i kam long wanwok bilong mipela yet.

Olgeta i tok stret long serim bilong ol. Long dispela we mipela i strongim narapela narapela. Mipela i luksave olsem mekim wok pater i save bringim planti blesing na hevi long laip bilong mipela.

Tripela de mipela i wokim serim. Mipela i bungim olgeta serim na bai kamapim wanpela buk bilong memori bilong mipela.

Tupela ful de, mipela i lukluk raun long Jakarta; visitim kain kain ples bilong turis; rekriesen; museum na Beautiful Mini Park Indonesia (**Taman Mini Indonesia Indah**).

Long Misen Sande, mipela i bung long Galaxy Peris; wanpela klas meit bilong mipela i wok pater long dispela peris. I gat wanpela liklik grup insait long peris ol i kolim **KEP (Parish Evangelisation Group)**.

Olgeta akomodesen, kaikai, transport bilong raun, entri tiket long visitim kain kain ples long Jakarta, ol memba bilong KEP i bin baim olgeta. Ol i gat bigpela komitmen bilong ol long sapatim wok bilong olgeta Pater.

Long Fraide nait, Sarere na Sande, wan wan bilong mipela i go stap na slip long wan wan famili bilong KEP. Inap long Sande (Misen Sande), mipela i selebretim namba tu Misa long San Bartolomeus Katolik sios long Galaxy Peris insait long Archdiocese bilong Jakarta. Manmeri i pulap tru na amamas lukim 12-pela pater i selebretim misa wantaim ol.

Bihain long Misa, mipela i bung kaikai wantaim ol memba bilong KEP na narapela manmeri bilong peris, singsing na danis soim amamas bilong mipela long sapat bilong KEP bilong San Barto peris.

Bihain long kaikai lans, mipela i go nabaut long redim mipela yet i go long peris o wok ples bilong mipela wan wan. Mi yet i go long Bangkok, bihainim narapela miting bilong ol SVD pater biilong Esia na Pasifik.



BAI SAPOTIM OL MISINERI: Nupela embaseda bilong Polan long PNG, Pawel Milewski, i bungim Gavana Jenerel Sir Michael Ogio na tupela i sekan. *Poto: GG Midia*

misin wok ol i mekim long olgeta hap bilong PNG long kamapim gut laip bilong ol pipel na ol famili bilong ol.

“Bai mipela i sapatim ol misineri bilong mipela long go hetim ol developmen projek ol sios i wokim,” Embaseda Milewski, i tok.

Long wankain taim, em i tok gavman bilong Polan i laik mekim wok bisnis long PNG, wanpela kantri

i wok long gro hariap long sait bilong bisnis na tu, em i gat planti risos.

“Bai mi strongim ol lain i makim ol bisnis long kam long PNG na lukluk long ol sans i stap long maining, egrikalsa, masineri, bilding bisnis na planti arapela moa,” Embaseda Milewski i tok.

Em i tok stap bilong em long PNG i bilong strongim ol bailaterel na wok pren na wok

bung wantaim long iekonomik na tred.

Em i tok Polan i wanpela strongpela kantri long Yuropien Yunien na ikonomi bilong em i groa hariap long Sentrel Yurop. Na em i gat ol bikpela maket bilong em.

Long wok taim bilong em long PNG, em i gat strongpela tingting long kontribuit long gutpela developmen na wok pren namel long tupela kantri.

OI ELCPNG Yut bung long Henganofi

Paulus Tali i raitim

MOA LONG 10,000 yut bilong ELCPNG i bin bung long namba 16 konprens bilong ol long Henganofi stesin long Isten Hailans Provins, 23 i go pinis long 27 Septemba, 2013.

Dispela bung i save kamap olgeta tupelo yia. Ol yut i bung na toktok long wok yut insait long wan wan distrik, harim Baibel stadi na tu mekim ol kalsa so olsem Christ In Culture, soim drama na kamapim ol tumbuna singsing, lotu na amamas wantaim insait long sios.

Reveren Matei Ibak i givim Baibel stadi bihainim het tok, ‘God i makim mi long karim kaikai,’ John 15:16. Dispela stadi i mekim ol wan wan yut memba i luksave long wok-abaut bilong ol. Stadi i soim olsem, wokabaut bilong ol yut na ol yet i no lain nating, tasol ol inap mekim senis insait long laip bilong ol.

Reveren Ibak i tokim ol yangpela olsem, yu wan wan yut i no ken lukim arapela lain tasol i gat wok. Long wanem dispela kain tok bai daunim yu yet long mekim gutpela wok God i makim pinis bilong yu long mekim. Em i soim olsem ol yangpela i mas stap insait long pasin bilong pas wantaim God long olgeta taim na laip bilong ol. Na long dispela rot tasol bai ol yangpela i lukim senis insait long laip bilong ol, na pasin bilong senis tu bai



Wanpela deleget i mekim toktok bilong em long ELCPNG Youth conference. *Poto: Paulus Tali*

bringim planti blesing long Kristen laip bilong ol.

Wanpela yut lida bilong Boana distrik, Tony Kudang, i amamas long lukim ol yut na em i tok, Tok bilong God tasol bai helpim ol yangpela long senisim laip bilong ol na stap stret insait long Kristen laip

Wanpela bikpela samting i kamap insait long konprens i soim senis insait long laip bilong ol yangpela. Tok bilong

God tasol i mekim na ol yangpela bilong Rihona seket i kam aut na tok sori long pasin ol i wokim long kirapim wok bilong drag na mariwana. Long ai bilong ol yangpela wantaim ol asples manmeri, sios na gavman, ol yangpela i tok sori long pasin nogut bilong ol na promis long statim nupela wokabaut insait long laip bilong ol. Man husat i go pas long

lusim pasin bilong groim na salim mariwana, Misak Kubau husat i save lotu long Seven De Sios insait long Dunantuna eria i tok sori long ol pasin nogut em wantaim lain bilong en i bin mekim long bagarapim ol manmeri. Planti hevi bilong drag wantaim hold ap long Barola maunten, Kompri na Henganofi haiwe i tokaut na promis long i no inap go bek long pasin nogut.

WOL NIUS LONG POTO



Japan's Prime Minister Shinzo Abe. (Credit: Reuters)

Japan PM i toklukaut long ol balus blong Saina

Japan i bin hariap long salim ol jet balus bilong pait insait long tupela de bihain long 4- pela militeri balus bilong Saina i plai antap long intenesenel wara klostu long ol ailan bilong Okinawa long Japan.

Jiji Pres na Kyodo Nius Ejensi i bin ripot olsem ol Saina militeri balus i bin ran long Is Saina Si i go long Pacifik Osen na i go bek gen, tasol ol i no go insait long mak bilong Japan.

Difens ministri bilong Japan i no givimaut wanpela toktok long dispela yet.

Tasol ministri i wok long was gut long pasin Saina militeri i wok long mekim wok long Is Saina Si we Tokyo na Beijing i kros pait long sampela liklik ailan i stap namel long Okinawa na Taiwan.

Praim Ministri Shinzo Abe i bin tok ating em i luk olsem Saina i laik long yusim fos long kisim ol dispela ailan. Em i tok dispela bai mekim olgeta samting i no kamap long bel isi pasin.

Indonesia i toktok gen long spesel atonomi

Gavman bilong Indonesia i holim ol tok-tok gen long kamapim wanpela spesel atonomi insait long ol provins bilong en.

Ol sumatin long Yuniversiti bilong Sendrawasih long Jayapura bai bung tude long toktok long wanpla tingting em Sentral Gavman bilong Indonesia i wok long mekim nau long kamapim wanpela kain spesol otonomi bilong ol provins blong en.

Tasol dispela ol toktok blong Sentral Gavman i no go gut wantaim ol pipel bilong Wes Papua Provins.

Ronnie Kareni, wanpela Wes Papua ektivis long Australia, husat i stap namel long PNG na Indonesia, i tokim Radio Australia olsem dispela spesel atonomi em Indonesia gavman i laik kamapim i no nupela samting.

Virgin kokonas i gutpela moa long kopra

Nupela kain bisnis long wokim kokonas wel i gutpela moa bilong kisim mani winim wok long katim kopra.

Bob Pollard, Menesing Dairekta bilong Coconut Pacific Solomon Ailan husat i wanpela bisnisman long Solomon Ailan i tok ol pipel inap kisim bikpela moa mani sapos ol i mekim virgin kokonas oil, na i no kopra.

Mista Pollard i tok ol kokonas fama i ken kisim moa mani sapos ol i mekim virgin kokonas wel.

Mista Pollard i mekim dispela toktok long bisnis forum na tred ekspo I bin kamap long Brisbane, Australia, las wik.

Em i tok planti provins long Solomon Ailan i stat pinis long wokim virgin kokonas wel na ol i plen long kamapim dispela bisnis long kantri i go moa.

Ol i save eksptim dispela virgin wel long Australia na em i bin go long dispela bisnis bung long Brisbane bilong painim moa maket blong dispela kain kokonas wel bisnis.

Solomon i no kisim gutpela benefit long tuna

Solomon Ailan i gat gutpela solwara we i gat planti tuna pis tasol em i no kisim bikpela mani na bisnis long en.

Menesing Dairekta bilong Soltuna, namba wan pis kampani bilong Solomon Ailan, i tok kantri i no kisim gutpela bekim long ol tuna pis we i stap insait long solwara bilong en.

Adrian Wickham i tok ol foren pisg bot i save kisim inap long 150 tausen ton tuna long Solomon Ailan insait long wanpela yia na ol i go prosesim long kantri bilong ol yet.

Na em i tok samting olsem 20 tausen ton tasol em ol i prosesim long Solomon Ailan yet.

Mista Wickham i tok dispela i mekim kantri i lusim planti mani we i ken stap insait Solomon Ailan yet sapos ol i prosesim long kantri na eksptim.

Em i tok planti long ol tuna tinpis we ol i mekim long Solomon Ailan ol i salim yet long kantri, sampela ol i salim go long ol Melanesian kantri olsem PNG, Vanuatu, Fiji na tu long Australia na Nu Silan.

Mista Wickham i bin stap tu long dispela Australia Solomon Islands Business Forum na Tred Ekspo long Brisbane bilong promotim sastenabal developmen bilong ol tuna risos long kantri.



Australia: Tupela man i tokaut long we ol i hangamap long ea matres bihain long liklik balus bilong ol i pundaun long Bass Strait long Australia. Balus i tanim na pundaun long het bilong em na paia long ol liklik liklik hap. Pilot Shayd Hector na pasindia Joel Nelson bilong New Castle i wok long flai long Bridport long hap Not bilong Tasmania i go long Flinders ailan na pilim olsem ensin bilong balus i kamapim liklik trabel na ol i pundaunim balus i go insait long solwara.



Yunaitet Stet: Giant George, longpela dok bilong wol i dai long Fraide Oktoba 25, 2013. Em i wanpela sori de long makim dai bilong dispela traipela na longpela dok. Em i go raun long bikpela enimal fam bilong famili bilong em long Arizona long US na dai long hap. Krismas bilong George i makim 7 yia na go klostu long 8 yia. George i go insait Gines Buk ov Wol Rekots long 2010 long 1.9m longpela bilong em na taim em i sanap long tupela lek bilong em, em stap long 2.2m na winim ol longpela basketbal pilaia.



China: Wanpela man long Saina i kirap nogut taim em i laik opim wanpela botol yogurt dring na botol i pairap olsem bom na bagarapim pes bilong em. Man ya i kisim bikpela bagarap long pes bilong em we ai bilong em i solap na ol dokta i tok narapela sait bilong ai i no inap wok gut. Kampani husat i kamapim dispela dring i salim 10-pela katen dring long em long tok sori long em tasol man ya i les long lukim wanpela bilong ol dispela dring.

Klinim siti em i bikpela wok tru



Mosbi siti em i wanpela siti i wok long gro hairap tru. Tenpela yia i go pinis, i no gat planti bikpela haus bilong ol kampani o i no gat planti kar long rot o i no gat bikpela populesen tumas. Pes bilong siti i senis na olgeta de dispela senis i wok long kamap yet.

I gat moa developmen i kamap long ol ples autsait long siti we bipo i gat bus na diwai kumurere tasol i gro long en. Populesen bilong siti i wok long gro tu na mak bilong ol pipel i kamap pinis long mak bilong wan milien. I gat kain kain manmeri i kapsait i kam long siti na long taim i no gat spes, planti bilong ol i go slip nabaut long ol setelmen. I luk olsem no gat man i save long namba tru bilong ol setelmen insait na autsait tu long siti. Yumi harim stori na lukim bikpela namba bilong ol pipel i wetim bas long go long ol setelmen na yumi kisim aidia long bikpela populesen bilong ol setelmen. Em i no gutpela rot bilong plenim sindaun bilong ol pipel long bihaintaim.

Gavana bilong Nesenel Kepitel Distrik (NCD) em i wanpela lida husat i luksave long ol dispela hevi. Em yet wantaim ol opisa bilong Nesenel Kepitel Distrik Komisaris (NCDC) i gat plen bilong kamapim gut siti we ol pipel na bisnis i ken sindaun gut na mekim wok bilong ol. Gavana i gat plen bilong senisim sampela setelmen na mekim ol i kamap sabab bilong siti. Em i gutpela



tingting na pablik i givim bikpela sapot long dispela plen bilong gavana. Long taim ol dispela setelmen i kamap sabab, bai i gat kontrol long wara na pawa na ol arapela pablik yutitit em ol i save kisim fri nau. NCDC i ken kisim takis long ol tu na kamapim moa mani bilong bringim sevis i go bek long ol pipel insait long siti husat i yusim ol dispela sevis nau. Ol kain sevis olsem wara, pawa, takis bilong graun, takis bilong rausim pipia. Long tok Inglis ol i tok 'user pay' - yu yusim, yu baim. Bikpela siti long kantri bi-

long yumi i mas gat wankain luksave olsem ol arapela siti long wol. Yumi winim yia 2000 na kamap long mak bilong 2013 na i mas gat senis i kamap tu long pes bilong siti bilong yumi. Ol gutpela senis i ken kamap sapos olgeta gavman dipatmen i wok bung wantaim lain bilong NCDC long kamapim senis. I mas gat strongpela lo i stap ples klia long wanem kain ol haus na samting ol pipel o kampani i ken sanapim. Ol i no mas kalapim mak i go insait long graun bilong gavman na mekim nating. Plen

bilong ol wok insait long siti i stap. Gavman bilong Australia i bin wokim ol plen na sanapim ol bikpela saking olsem wara saplai, ol paip bilong rausim pipia bilong toilet, ilektrik pawa na ol telipon waia. Bikpela wok bilong stretim ol dispela samting i bin kamap bihain long yia 1950 na 1960 samting. Olsem na planti bilong ol dispela samting i winim yia pinis na i no inap mekim wok bilong lukautim wan milien manmeri tude. Long taim gavman bilong Australia i bin sanapim ol dispela samting, populesen

bilong Mobi i bin stap daun-bilo tru. Olsem na tude yumi mas senisim na wokim ol i bikpela inap long mak bilong populesen.

Tasol i gat hevi i kamap nau long ples bilong rausim ol pipia bilong toilet. Ol paip i blok na i no gat moa spes long ol raunwara i save klinim ol pipia. Waigani Swamp em i bikpela raunwara tasol i save mekim dispela wok, tasol tude i no gat moa spes. Ol i bin stretim Waigani Swamp long klinim pipia wara bilong siti long 1963 taim taun i liklik yet. Na i bin gat moa wok i kamap long 1968 na 1986, tasol populesen bilong siti i kamap bikpela moa na nau i taim bilong painim narapela rot bilong rausim ol pipia. Dispela em i bikpela hatwok na i mas gat mani na ol saveman bilong mekim wok sapos yumi laik lukim ol senis i kamap long siti.

Gavana na ol opisa bilong NCDC i mekim wok bilong ol na yumi ol pablik tu i mas yusim het na traim abrusim pasin bilong bagarapim samting. Yumi lukautim gut rot bilong rausim pipia bai i no gat bikpela hevi i kamap. Olgeta de insait long siti i gat bagarap i kamap long ol paip bilong toilet. Wara i kapsait i go aut na ran long baret bilong ren wara tasol smel i bagarapim ples. Long taim dispela kain hevi i kamap, ol pablik i ting bai ol i sindaun nating na larim ol wokman bilong Eda Ranu i kam fiksim. Ol i ken stretim tasol wankain hevi bai kamap oltaim bikos yumi no lukautim gut.

Long 2008, i bin gat wanpela wok painimaut long

stretim ol ples bilong rausim pipia insait long siti. Gavman bilong Japan wantaim han bilong en Japan Intenesenel Kopresen Ejensi (JICA) bai redi long stretim ples bilong rausim ol pipia bilong toilet insait long siti. Gavman bilong Japan bai putim sampela mani na gavman bilong PNG tu i mas putim skel bilong en, K20 milien. Tasol projek i no bin go insait long baset bilong 2009 na olgeta wok i hanagamap tasol i stap inap nau.

Ol pipel bilong siti bai amamas long harim olsem dispela bikpela wok bilong Pot Mosbi Suris Sistem Agred Projek bai stat nau. Independen Pablik Bisnis Kopresen bai makim gavman bilong PNG na wok wantaim JICA. Ol wok bai stat neks yia long Kanudi, Kilakila na Joyce Bay na Eda Ranu bai lukautim long taim olgeta wok i pinis. Dispela nupela ples bilong rausim pipia bai inap long mak bilong intenesenel stended na inap mekim gut wok inap 25 yia.

Mosbi i laki siti. Bikos i gat ol dispela bikpela sevis bai kamap na lukautim laip bilong ol pipel. Ol arapela bikpela taun long PNG i no lukim kain developmen olsem i kamap. Long planti taun ol i yusim baket yet. Olsem na mobeta ol lain long Mosbi husat i yusim dispela sevis i mas yusim het na lukautim gut. Ol lain i lukautim dispela projek tu i mas lukim olsem olgeta yia, i mas gat mani long baset bilong lukautim gut kain bikpela samting olsem insait long siti. I luk olsem ol wok bilong klinim Mosbi siti i stat tru nau.

Korapsen i bikpela long kantri: Namah

Stanley Nondol i raitim

OPOSISEN i tok pasin korapsen long Papua Niugini i go antap tru kilim dai sosaiti bilong bihain. Na singaut long olgeta pipel wantaim gavman long wok bung long daunim.

Oposisen lida Belden Namah wantaim deputi bilong em Sam Basil i autim strongpela bel wari na tokaut long pablik olsem pasin korapsen bikpela tru long kantri na bikpela milien kina bilong pablik i wok long lus long bikpela gavman opis.

Mista Namha i tokim wanpela nius konprens long Pot Mosbi long dispela wok olsem pasin korapsen i go bikpela na kilim dai kantri stap.

Em tok korapsen i wanpela bikpela hevi na gavman, oposisen na ol arapela bodi mas wok bung long daunim.

Mista Namah i mekim dispela toktok bihain long em i bin

tok Praim Minista Peter O'Neill, Fainens Minista James Marape na Tresari Minista Don Polye long lusim wok bilong ol long pablik opis na larim Task Fos Sweep na polis i mekim wok painim long lus bilong K71.8 milien long Fainens dipatmen.

Mista Namha i tok bilong wanem na ol tripela lain ya i stap yet. Em tok dispela kain em i no stret long wok painim bai ron gut.

Mista Namah tu i askim Mista O'Neill long givim wok bilong polis Minista i go long narapela memba.

Tasol long bekim Minista Marape na Polye wantaim Mista O'Neill i tok gavman i no stopim o mekim wanpela samting long wok painim bilong



Oposisen lida Belden Namah.

polis na Tas Fos Sweep.

Ol i tok wok painim i go het long rot lo i tok na ol i no gat asua long lusim wok.

Wankain taim Mista namah i

tokim midia long kantri long wok indepeden long tokaut long pasin korapsen we i kamap long gavman.

Mista Namah i tok gavman i noken tokim nius lain long wanem ripot ol i laik putim kamaut long pablik.

Mista Namah i mekim dispela toktok bihain long midia i no putim kam long sampela toktok em mekim long Praim Minista long kot keis bilong Paul Paraka.

Bihain long midia konfrens bilong Mista Namah, wanpela pas i kam long opis bilong Praim Minista i tok long ol samting i stap long kot na em bai asua sapos midia i tokaut long pablik.

Mista Namh i tok dispela i no tru na em i tokim midia mas mekim wok bilong ol indepeden na i no ken harim tok bilong praim minista o husait.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Acting Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest or its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat

Raun wantaim Wantok kru ...



Sales Agents bilong Wantok long Karkar i soim nius i stap insait long Wantok Niuspepa. Wantok nau i save go long Karkar olgeta wik.

Ol mangi painim pis long wiken abus.

EMTV Television Guide

FONDE OKTOBA 31, 2013

4:30 AM G JOYCE MEYER - 1050-4
5:00 AM G EMTV NEWS REPLAY
6:00 AM G R/LEAGUE W/ CUP - GAME 7

6:00 PM G EMTV NATIONAL NEWS
7:00 PM G R/LEAGUE W/CUP - REPLAY
9:00 PM G RESOURCE PNG EP#94

FRAIDE NOVEMBA 1, 2013

4:57 AM G AUSTRALIA NETWORK
5:00 AM G JOYCE MEYER - 1050-5
5:30 AM G EMTV NEWS REPLAY

11:20am Grade 8 Science
1:00pm Grade 6 Mathematics
1:50pm Grade 6 Science
2:30pm DEPI Program

SARARE NOVEMBA 2, 2013

4:57 AM G AUSTRALIA NETWORK
5:00 AM G R/LEAGUE W/CUP - GAME 8
7:00 AM G IN HIS STEPS EP#08

SANDE NOVEMBA 3, 2013

12:30 AM G R/LEAGUE W/CUP - GAME 9
4:57 AM G AUSTRALIA NETWORK
5:30 AM G EMTV NEWS REPLAY

TORO



BIABIA



KANAGE



TOKWIN

O'Neil bai kilim dai lam bilong PNG Pawa bos...

PM i no wanpela tru taim pawa long Mosbi na Lae i wok long pas klostu klostu na askim long long boss long PNG Pawa i kam long stretim dispela wari.

Tasol ekting CEO bilong PNG pawa wok long atanim dispela bung na PM askim long boss tru tru i stap o nogat. Bekim em, 'em stap long ovasis'...

Em painim wanem samting long ovasis taim yumi gat bikipela problem long pawa blekaut long hia (PNG).

PM em belhat nogut tru na em bai mekim sampela ol strongpela



Poto i soim ol deleget wantaim CEO bilong PNG Pawa husat i bihanim PM i go long Israel...PM i kambek pinis tasol ol lain i raun i go long Inland na lukim tim Kumul i pilai..

disisen long ol Bod bilong PNG Pawa neks wik, em tok.

Dispela i gut tumas taim PNG i gat planti bekaut tumas na ol Bod na menesmen bilong PNG Pawa i stap long ovasis...

Oh sori, PM bai kilim dai lam bilong sampela lain long PNG Pawa.

Yumi wet na lukluk tasol...

Tokwin Tasol..

Long yupela ol gutpela Wantok rida i save wokim ol Sudoku kroswod pasel, dispela em nupela SUDOKU.

Long solvim Sudoku pasel, putim wanpela namba long wan wan bokis na olgeta ro olsem akros, daun, na olgeta liklik 9-pela bokis skwea long bikpela daigrem o bokis (i gat 9-pela olgeta) bai gat ol namba long 1 inap long 9. Wanpela namba i mas kamap wanpela taim tasol long wanpela ro. Wok wantaim ol namba olsem gaid o stia na wok long pinisim wan wan daigrem wantaim ol missing namba we bai mekim yu painim solusen. Tenkyu na gutpela pilai

STATIM PILAI

Lukluk long namba 9 kolom, bilong pasel piksa i stap long han kais. i gat ol sain insait long pasel bai i ken toksave long wanem hap insait long dispela kolom bai namba 3 i go.

Nambawan sain i stap long namba 8 kolom insait long piksa. I gat wanpela namba 3 insait long namba 5 bokis. Bai yumi i no i nap long putim wankain namba tupela taim insait long wanpela 3 x 3 bokis eria, olsem na yumi bai i no i nap putim namba 3 insait long bokis namba foa, faiv o siks insait long namba 9 kolom.

Yumi ken rausim tu tripela bokis daunbilo tru long namba 9 kolom bikos i gat wanpela namba 3 insait long dispela 3 x 3 bokis eria tu. Olsem na dispela namba 3 i mas go long namba 2 o 3 bokis bilong namba 9 kolom.

Laspela sain nau i stap insait long namba 2 lain bilong piksa na em i gat wanpela namba 3 pinis long en. Loa bilong pilai i tambu long wanpela namba i kamap tupela taim insait long wanpela lain, olsem na i gat wanpela bokis tasol nau i stap long dispela namba 3 i go insait — em namba 3 bokis bilong namba 9 kolom.

Bihainim dispela stail na wankain tingting na rausim i nap ol pasel bokis i pulap olgeta. Sapos yu laik save moa long insait bilong dispela pilai, yu ken go long webait long penny-dellpuzzles.com.

EXAMPLE

	7	9				1
2	3	8			6	7
	6		2	7		
7	8	5				
5	2	6		3		
			1	9	5	
		6	3	8		
8	4			9	2	1
2				1	3	

EXAMPLE SOLUTION

8	4	7	9	6	3	5	2	1
1	2	3	8	4	5	6	7	9
5	9	6	1	2	7	4	8	3
9	7	8	3	5	4	1	6	2
4	5	1	2	9	6	7	3	8
6	3	2	7	1	8	9	5	4
7	1	9	6	3	2	8	4	5
3	8	4	5	7	9	2	1	6
2	6	5	4	8	1	3	9	7

Ansa bilong las wik SUDOKU 17

9	3	7	2	4	8	1	6	5
1	6	2	5	9	7	8	3	4
5	4	8	1	6	3	2	7	9
3	7	5	9	2	4	6	8	1
8	9	1	7	3	6	5	4	2
4	2	6	8	1	5	3	9	7
2	8	4	6	5	9	7	1	3
6	5	9	3	7	1	4	2	8
7	1	3	4	8	2	9	5	6

8	4				6			3	
	3	5			4			6	9
				1			7	4	
2	5	1	4	6					
				8					
					9	2	6	5	1
	7	4			5				
3	2		6			5	9		
5			8					2	7

Ansa bilong SUDOKU 18 long neks isu.

EMTV Television Guide

9:00 PM G	60 MINUTES	10:40am	Grade 8 Mathematics	5:00 AM G	EMTV NEWS REPLAY	7:00 PM G	RUGBY LEAGUE WORLD CUP — REPLAY GAME 5	1:50pm	Grade 6 Science
10:00 PM G	HILLSONG Rpt...	11:20am	Grade 8 Science	6:00 AM G	RUGBY LEAGUE WORLD CUP — GAME 5		FIJI vs. IRELAND	2:30pm	DEPI Program
10:30 AM G	EMTV NEWS — Replay	1:00pm	Grade 6 Mathematics		Fiji vs. Ireland	9:00 PM G	BUSINESS PNG — Ep#41	3:30 PM	Kids Kona
.....	followed by the Australia Network	1:50pm	Grade 6 Science	8:00 AM G	TODAY	9:30 PM G	HAUS& HOME Ep#38	3:30 PM	HI 5 — S7 Ep#30/47
		2:30pm	DEPI Program	09:00 AM	Classroom Broadcast	10:30 PM G	EMTV NEWS REPLAY	4:00PM	GOT TO GO Ep# 2/20
		3:30 PM G	KIDS KONA	9:00am	Grade 7 Mathematics	followed by the Australia Network	4:30PM	KINGDOM OF PARAMITHI Ep#8/26
		3:30 PM	HI 5 — S7 Ep#28/47	9:50am	Grade 7 Science			5:00 PM G	KITCHEN WHIZ S4 Ep#48
		4:00 PM G	RUGBY LEAGUE WORLD CUP — REPLAY New Zealand vs. Samoa	10:40am	Grade 8 Mathematics			5:30 PM G	TRICKY TV S3 — Ep#5/20
		5:57 PM G	CRIME STOPPERS	11:20am	Grade 8 Science			5:57 PM G	CRIME STOPPERS
2:00 AM G	RUGBY LEAGUE WORLD CUP — PNG vs. FRANCE	6:00 PM G	EMTV NATIONAL NEWS	1:00pm	Grade 6 Mathematics			6:00 PM G	EMTV NATIONAL NEWS
G	RUGBY LEAGUE WORLD CUP — New Zealand vs. Samoa	7:00 PM G	RUGBY LEAGUE WORLD CUP — REPLAY GAME 3	1:50pm	Grade 6 Science			7:00 AM G	RUGBY LEAGUE WORLD CUP — OUR PORT MORESBY — Ep#1 —
		9:00 PM G	COCA-COLA SPORTS SCENE EP	2:30pm	DEPI Program			9:00 PM G	TOKPIKSA Ep#39— Repeat....
4:00 AM G	RUGBY LEAGUE WORLD CUP — JOYCE MEYER — 1050-1	9:30 PM G	EMTV NEWS REPLAY	3:30 PM G	KIDS KONA			9:30 PM G	TOKPIKSA Ep#39— Repeat....
6:00 AM G	JOYCE MEYER — 1050-1	followed by the Australia Network	3:30 PM	HI 5 — S7 Ep#29/47			10:00 PM MA	ARROW Ep#17
6:30 G	EMTV NEWS REPLAY			4:00PM	GOT TO GO Ep#1/20			11:00 PM G	NEWS REPLAY
7:00 AM G	TODAY			4:30PM	KINGDOM OF PARAMITHI			followed by the Australia Network
09:00 AM	Classroom Broadcast			5:00 PM G	KITCHEN WHIZ S4 Ep#47				
09:00am	Grade 7 Mathematics			5:30 PM G	DANI'S HOUSE YR2. Ep#13/13				
09:50am	Grade 7 Science	4:30 AM G	JOYCE MEYER - 1050-2	6:00 PM G	EMTV NATIONAL NEWS				

Ol Progam na Kilok i ken tenis oltaim...

Wiken poto



KALSA KILIM OL: Tupela liklik pikinini bilong Ferguson Ailan long Milen Be Provins i putim tumbuna bilas na redi long danis long welkam seremoni bilong ol lida bilong Melanesen Spiahet Grup (MSG) i bin lukluk raun i go long provins las wik. **Poto: Bola Noho, NESENEL Kalsereel Komisnin (NCC) Midia**



OL MSG LIDA: Ol lida bilong ol MSG kantri i kamap long Alotau na raun lukluk long ol ples. Wantaim ol em Dairekta bilong NCC, Dokta Jacob Simet na wanpela memba bilong Milen Be Provinsal Gavman. **Poto: Bola Noho, Nesenel Kalsereel Komisnin Midia**



I GAT TAIM BILONG LAP: Tupela pani man, Simon na Watete i save mekim ol manmeri i lap wantaim ol pani eksen na toktok bilong ol. **Poto: Nicky Bernard**

Raun wantaim Kanage olgeta wik

Mangi bilong bus

Papa Kanage em wanpela stail mangi bilong Wara Sepik. Wanpela taim em go raun long Bogia distrik long Madang provins. Olgeta taim Kanage save raun wantaim ol yangpela mangi tasol. Tingting na toktok bilong em tu olsem ol yangpela mangi. Em stap na poroman wantaim ol yangpela meri long ples. Wanpela taim ol meri pasim tok na holim pasim Kanage long rot na karim em go. Long bikmoning, Kanage stori long ol mangi, "Wan i kam, 2 kina i go. Tu i kam, 2 kina i go, na tri i kam, 2 kina i go gen. Namba foa i kam, sori, poket bruk olgeta!"

TT Angoram

Hatwok karim kaikai

Kanage wantaim misis bilong em wok long wanpela kampani. Tupela wok go na misis bilong Kanage i gat bel. Misis bilong Kanage wok go na tupela mun bipo em bai karim em tokim bikbos bilong ol na kisim 6-pela mun malolo bilong



em. Kanage tingting go na em pilim olsem em i no stret. Kanage go lukim bos bilong em na tokim em, "Bos, misis bilong mi kisim 6-pela mun malolo. Inap mi kisim 6-pela mun malolo tu?" Bos lukluk long Kanage na askim, "Olsem wanem, yu i gat bel tu?" Kanage bekim, "Bos, yu save luksave olsem mitupela i wok hat ya. Olsem na nau kaikai bilong hatwok laik kamap ples klia, mitupela wantaim i mas malolo."

Masta Kanage Daru

Marasin nogut

Bikpela sik wilwilim papa Kanage ne em slip long haus stap. Em askim pikinini meri bilong em long go askim ol lain long haus sik long sampela marasin. Pikinini bilong em i gat bel na em go long haus sik kisim marasin bilong em na em

lus tingting long kisim marasin bilong papa bilong em. Long apinun em kam bek long haus. Kanage slip go na em kirap lukim ol marasin stap insait long bilum bilong pikinini meri bilong em. Isi tasol Kanage kisim bilum bilong pikinini bilong em na rausim ol marasin. Em lukim na ting olsem disprin o aspirin. Kanage kisim wanpela kap wara na dring wanpela marasin na slip gen. Pikinini bilong em lukim olsem bilum bilong em slip arere long papa bilong em. Em kirapim Kanage na askim em sapos em rausim bilum bilong em. Kanage tokim em, "Yes, pikinini. Mi kisim marasin bilong mi na mi dring olsem na mi slip." Pikinini bilong em singaut go long mama bilong em, "Aiyol! Mama, papa i paul na dring marasin bilong ol mama i gat bel ya!" Misis bilong Kanage harim na tok, "Larim, pikinini. Papa dring na em bai kisim ples bilong yu na yu ken malolo!"

Porohia Duo Vanim

Ol skwat! Teksim ol gutpela Kanage tok pilai i kam long: Txt: 72356149

Boipren i bikhet long mi

Dia Laipain

Mi wanpela sumatin meri i gat 19 krismas na mi stap long gret 12. Mi gat boipren pinis. Mitupela i bin bung long taim mipela i wokim gret 3. Mi skul nau long narapela provins.

Taim mi skul i stap long narapela provins, kasen susa bilong mi i tokim mi olsem em i raun wantaim boipren bilong mi. Mi wari na sori nogut tru taim mi harim dispela nius. Taim mi go long Krismas malolo, mi askim boipren na em i tok dispela nius em i tru. Taim em i toktok, em i lukluk stret long ai bilong mi na em i tok mi olsem mi namba wan lewa bilong em stret na oltaim bai mi stap olsem gel bilong em.

Long mi tu, em i namba wan boipren mi gat na em tu i bin katim lewa bilong mi. Na mitupela i bin promis olsem bai mitupela i marit taim mipela i pinisim skul. Kasen bilong mi i tokim mi long lusim em tasol mi painim hat long lusim tingting long em, maski em i tok em i bin raun wantaim kasen susa bilong mi.

Plis helpim mi.

Undecided Lover

Dia Pren

TENKYU long autim wari bilong yu wantaim mipela. Mipela i sori long ritim stori bilong yu na mipela i luksave long wari bilong yu long boipren bilong yu.

Pren, mipela i save kisim ol wankain pas long planti meri wantaim dispela kain wari. Mipela i luksave olsem bikos yutupela i poroman longpela taim, em i no isi long luksave olsem em i wok long lukim narapela meri. Na i no narapela meri tasol kasen susa bilong yu.



Yu wok long painim hat long lusim em bikos, em i namba wan boipren bilong yu. Na yutupela i bin tok promis long marit bihain long yutupela i pinisim skul. Yu pilim olsem wanem nau long dispela promis bihain long man i wokim bikhet pasin long yu? Na bai yu save olsem wanem bai em i no inap mekim ol bikhet pasin gen? Em i lukim yu long ai na tokim yu olsem yu namba wan lewa i no ken mekim yu bilip olsem em i gat bikpela laik yet. Na long wankain taim, em i no stretim asua bilong em. Bai yu trastim em gen o nogat?

Yu tok tu olsem em i namba wan boipren yu laikim tumas na em i namba wan lewa bilong yu. Yu ting em i wokim trupela toktok taim em i tok em i gat laik long yu tasol em i lukim narapela husat i kasen bilong yu?

Pren, yu klia long wanem em trupela lav o laik pasin? Lav em maski wanem samting, yu mas pas wantaim na mekim gut long narapela husat yu pren wantaim. Lav i min olsem yu no tingim yu yet bikos yu tingim patna bilong yu moa yet long yu yet. Hia em tupela wod yu mas sekim na save long ming bilong ol. Em long "Lust" na "Infatuation".

Ol papamama bilong yu i tok orait long yu i gat boipren? Mipela i laikim yu mas tingting strong long skul bilong yu. Ating dispela i kamap long mekim

yu tingting long prensip bilong yu wantaim mangi ya. Mobeta yu lusim em na yu wok strong long stadi bilong yu. Sapos em i laikim yu tru, em i ken helpim yu wet inap yu pinisim skul, painim wok na bihain long dispela, plenim marit bilong yutupela.

Yu luksave olsem taim yu gat boipren yu givim yu yet moa wok antap long ol stadi bilong yu? Ol taim we yu inap long yusim long mekim stadi bilong yu gut em yu yusim long tingim na mekim ol samting i sut long boipren bilong yu. Tru tru, yu no gat wanpela samting i pasim yu wantaim dispela manki, tasol bikos yupela i bin mekim promis, yu wok long yusim taim na spes bilong yu long tingim em.

Mipela i strongim yu long serim ol wari yu gat wantaim ol narapela gutpela pren o papamama na ol i ken helpim yu. Sapos yu memba bilong wanpela sios o lotu, i mobeta yu go lukim pasto long givim yu sampela gutpela stiatok.

Mi Pren bilong yu Laipain

Sapos yu gat wari o hevi, rait i kam long dispela edres: Lifeline Counselling Services, P O Box 6047, BOROKO, National Capital District, PNG. Yu ken ringim opis long telepon namba 3260011 o 3261680, o sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu. Laipain

ANZ mekim bikpela winmani

AUSTRALIAN na Niu Silen benking grup i tokaut long ANz i mekim bikpela profit long 2013 bihain long benk i kontrolim rot em yusim mani insait long bisnis em ronim.

ANZ em narapela bikpela komesel benk long kantri i tokaut long K2.89 profit long arere bilong Septemba long makim pinis bilong fainensel yia. Dispela em 8 pesen moa long profit benk i winim long wankain tam long 2012.

ANZ i tokaut long dispela long ripot bilong 2013.

ANZ mama kampani long Australia i mekim \$A 6.3 bilien o K14.46 bilien long

wankain taim long 2013. Na dispela em 11 pesen moa long winmani em i mekim long 2012.

Bikpela winmani long Nu Silan i kam long \$A 232 milien we i katim daun rot bilong yusim mani na taim moa long 800 wok mani benk i rausim long sevim mani.

Ripot i tok benk i mekim bikpela winmani bihain long em i yusim mani gut long givim dinau, katim namba bilong wok man kam daun na yusim mani gut insait long benking bisnis.

Ripot i tok maski benk i katim daun dinau, moa kastoma i go long benk long

yusim dinau fesiliti na lendin na kastoma deposit i gro long 4 pesen go long 7 pesen.

ANZ Sif Eksektiv Opis Mike Smith i tok 2013 em bin wanpela strongpela yia we benk i wok strong long groim domestik maket na surukim ol maket long Esia.

Mista Smith i tok stretpela wok, gutpela lidasip na gutpela kontrol bilong yusim mani i lukim bikpela winmani benk i mekim.

Mista Smith i tok benk i givim moa fainensel sapot i go long ol liklik bisnis kastoma na lukluk long kaampaim nupela rot long groim bisnis.

Wok painim bai kamap long Bisnis Divelpomen Gren

MINISTA bilong Tred Komes na Industri Richard Maru i givim tok orait long wok painim bai kamap long Bisnis Divelopmen Gren MDG mani we dipatmen bilong Komes na Industri i peim i go long ol Ambrela kamapnai.

Minista Maru i givim tok orait long wok painim bihain long em kisim ripot olsem BDG bilong PMIZ we dipatmen bilong Komes na Industri i peim long Anbrela kamapani long komyuniti long K1milien i lus long pasin korapsen.

Minista Maru i tok dispela wok poainim em bai kamap long gutpela bilong kantri noken lusim mani bilong divelopmen long pasin korapsen.

Minista Maru i tok ripot bi-

long wok painim bai helpim gavman no ken lusim mani long han bilong korap lain o kamapnai. Em tok dispela ripot tu bai helpim gavman long lukim gut na peim BDG i go long gutpela kamapni we bai yusim gut long wok divelopmen.

Minista Maru i tok BDG mani em long ol papagraun yusim long kirapim nupela bisnis na surkim ol bisnis go antap, kamapim moa wok, na lukim bisnis gro long komyuniti we projek bai kamap. Na i no bilong ol papa bilong kamapani long yusim nating long laik bilong ol.

Minista Maru i tok dipatmen bilong Komes, Tred na Industri bai kwik taim kamapim wok painim long

BDG mani we dipatmen i peim i go long tupela ambrela kamapni long Madang Industri Park Projek, Kananam Investmen Limited na Rehammab Holdings Limited.

Minista Maru i tok wok painim o odit bai kamap long BDG bilong LNG projek.

Minista Maru i tokaut olsem opis bilong Atoni Jenerel bai makim indepeden fainensel oditas long mekim wok painim long BDG mani we dipatmen bilong Komes Tred na Industri i peim long ol kamapni.

Minista Maru i singaut long ol kamapani husat i kisim BDG mani long redi wantaim mani ripot long Oditas bai kam sekim.

Westpac bai gat mobail benking

WESTPAC Benk i tokaut long plen bilong en long kisim mobail benking sevis i kam long givim gutpela na nupela sevis long mekim benking isi long ol kastoma.

Westpac i tok bisnis long kantri i gro na planti senis i wok long kamap long wol long benking na em i tok Mobail sevis bai kam insait long kantri long Fubrueri 2014.

Dispela em namba wan step long benk i laik givim gutpela sevis na stap pas yet wantaim kastoma. Dispela Mobail benking tu bai helpim ol lain i no gat benk akaun i ken yusim mobail pon long salim na kisim mani long Westpac.

Hetman bilong Mobail Benking, Gary Collind i tok mobail, benking bai helpim kastoma long sekim bales, salim mani, kisim mani, sekim stetmen na baim kaikai yusim mobail fon.

Mista Collins i tok Mobail Benking bai wok gut wantaim ol in stoa Benking we Westpac i putim pinis long planti hap long kantri na wok long putim long ol ples long distrik



Man i go pas long Mobail Benking Garry Collins(L) i soim mobail benking sevis long Westpac PNG Everywhere Benking tim lida Raphael Waitalaka.

na provins.

Westpac i putim pinis 179 in-Stoa Benking insait long pasifik.

Mista Collins i tok benki i amamas long givim gutpela sevis long ol pipel bilong PNG. Em i tok benk i lukluk long givim bikpela sans long ol pipel long ples na i no gat benk akaun na i stap long we long taun na siti.

Mista Collins i tok taim dispela Mobail benking i kam insait bai ol dispela lain i ken yusim olgeta de na nait long wanem hap ol stap.

Mista Collins i tok kastoma bai rejista long yusim Mobail benking klostu long taim bilong lonsing na benk bait ok save na helpim ol kastoma long stap insat long Mobail benking.

NRI bai mekim rises long ol main long Bulolo Distrik

Stanley Nondol i raitim

NESENEL Rises institut bai mekim wok painim long ol maining long Bulolo distrik long helpim papagraun na maining kamapni long kamapim gutpela MoU.

Dispela wok painim taim i pnins long mun Jenewari neks yia bai Bulolo distrik i ken yusim ol infomesen long dispela ripot long toktok wantaim ol maining kamapani long Bulolo na kamapim gutpela rot bilong skelimm ol winmani na sevis namel long maining lamapni, papagraun na gavman.

Deputi oposisen lida Sam Basil long las wik i givim sek mani bilong royalti bilong maining long Bulolo distrik long moa long K100,000 i go long NRI ekting Dairekta Dokta Charles Yala long mekim wok paining na akampim ripot.

Dokta Yala i tok planti ol maining kampani long kantri

i no givim gutpela luksave o sevis long ol papagraun long planti maining eria.

Dokta Yala i tok planti pipel long kantri i stap long turangu laip na planti ol papagraun long maining eria i paul long wanem samting ol bai mekim long kisim ol sevis na maining kamapi i mekim palnti mani na taim maining pinis bai ol ron we.

Dokta Yala na memba bilong Bulolo i sainim MoU long NRI bai mekim wok painim long Wau na Bulolo eria we i gat maining.

Taim dispela ripot i pinis bai ol papagraun na distrik bai yusim long kamapim gutpela MoU wantaim ol maining kampani long skelimm ol royalti na benefit long gutpela rot.

Mista Basil i tok nogat wanpela ripot i stap long kamapani na papagraun bei lukim long kamapim MoU na dispela i mekim ol papagraun i lusim gol long han bilong kamapani long planti yia.

Dokta Yala i tok maining na ol risos sekta i pilaim bikpela wok long kantri tasol wanpela bikpela salens em maining sekta i mekim bikpela senis long laip bilong ol papagraun na pipel bilong kantri o nogat?

Dokta Yala i tok bilong wanem na planti papagraun long maining eria wantaim planti pipel bilong kantri i stap turangu laip yet?

Dokta yala i tok wok maining i pulim bikpela bilien kina kam insait long baset bilong kantri long ol takis, ekuiti na royalti na ol arapela rot tasol laip bilong ol pipel i no gat senis em bikpela samting gavman i mas Ikuluk long kamapim gutpela lo long helpim ol pipel.

Dokta Yala i tok ol maining kamapai i kam long mekim win mani na bai go. Em tok gavman i mas mekim gut long long lukim ol pipel bilong kantri i kisim bikpela luksave long wok maining kamap long graun bilong ol.



P. O. Box 1982, Boroko, NCD 111, PNG. Tel: (675) 325 2500 Fax: (675) 325 2579
Email: imek@wantok.com / word@wantok.com.pg

“Need Wantok Niuspepa Street Sales & Retail Shop Agents Nationwide”

All you have to do is fill in the form below & send it to the Circulation Section on the above address for information.

Name _____

Postal Address _____

Telephone _____ Mobile _____

Fax: _____

Email _____

Signed _____ Date _____

Attn: Luke MEK (Circulation & Distribution)
Mobile: 73149358

Niuspepa Bilong Yumi Ol PNG Sret!!!

Papagraun bilong Hiden Veli go long kot

Stanley Nondol i raitim

OL PAPAGRAUN bilong Hiden Veli gol main long Morobe provins i no amas long sevis olsem royalti bilong main na ol i laikim kot bai tok kliia long ol benefit ol bai kisim aninit long ol agrimen na Mou bilong Hiden Veli main.

Ol papagraun bilong Nauti long Watut wantaim helpim bilong memba bilong Bulolo Sam Basil i givim K100,000 bilong royalti i go long Loani Henao loya makim ol long kot.

Watut lokal gavman presiden Waka Daimon i tok ol i no kisim sevis o royalti long 75 pesen long planti yia.

Mista Daimon i tok ol pipel bilong Nauti i stap isi na weit

long maining bai gat luk-save, tasol planti yia i go pinis na ol i no kisim gutpela sevis.

Mista Daimon i tok ol i bikipela papagraun bilong Hiden Veli main tasol nogat gutpela luksave olsem na ol i laikim kot bai stretim hevi na wari bilong ol pipel.

Ol papagraun bilong Hiden Veli bilong Nauti na Biangai vilis long ples Kuwembu na

Winima. Ol i save kisim sevis bilong maining long wanpela asosiesen bilong papagraun ol i kolim Nakuwi.

Hiden Veli deposit i kam long tupela pit-Hamata na Hiden Veli. Ol papagraun bilong Nauti i 100 pesen papa bilong Hamata na 50 pesen bilong Hiden Veli.

Ol i tok ol i gat rait long kisim benefit long 75 pesen na ol i laikim kot long tok kliia

long dispela we stap pinis long Mou.

Ol papagraun i tok ol laikim 75 pesen bilong Hiden Veli na Hamata.

Memba bilong Bulolo Sam Basil i tok kliia olsem em i sapotim ol Nauti pipel long kisim go long kot bikos ol pipel i nidim helpim na askim em olsem memba bilong ol long helpim ol.

Mista Basil i tok em i no

agensim, Morobe provinsel gavman, Hiden Veli maining o i no agensim wanpela man o kamapani.

Em i tok em laik bilong papagraun na nol gat rait long kisim i go long kot long wanem samting ol lukim i no kamap stret long wok maining long distrik bilong ol.

Mista Basil i tok ol papagraun i yusim royelti mani long baim loya.

Sam Basil laikim papagraun kisim moa royalti

Stanley Nondol i raitim

MEMBA bilong Bulolo, Sam Basil i tok bikipela milien kina bilong gol i go aut long Wau na Bulolo eria long Morobe long 1930 i kam inap nau na ol papagraun i no kisim gutpela sevis.

Mista Basil i tok dispela i kamap bikos nogat gutpela stadi o wok painim i kamap long save hamas gol bilong dispela i bin go aut

Mista Basil i tok Wau na Bulolo i pulap long gol tasol ol pipel i no kisim gutpela sevis na ol gol i go aut i no pulim bikipela na tru veliu bilong em.

Mista Basil i tok dispela kain pasin i no ken kamap long Hiden Veli Gol long distrik bilong em.

Mista Basil i mekim dispela toktok taim em i sainim wanpela MoU wantaim Nesenel Rises Institut ekting dairekta Dokta Charles Yala las wik.

Dispela MoU bai lukim NRI i mekim wok painim long Wau na Bulolo distrik we i gat gol long en bai tok kliia long rot ol papagraun bai kisim sevis.

Mista Basil i givim moa long K100,000 i go long NRI long mekim dispela wok painim. Taim NRI i pinisim wok painim bai Bulolo distrik i yusim toktok wantaim ol maining kampani long distrik long stretim MoU long givim gutpela luksaave i go long papagraun.

Mista Basil i tok Bulolo i gat nem long gat gol tasol ol pipel i misim planti



Sam Basil memba bilong Bulolo.

sans long kisim ol sevis na developmen bilong gol main. Em i singaut long ol narapela distrik long kantri i gat gol, kopa na maining long noken go long wankain rot olsem Bulolo distrik.

Sam Basil i tok aninit long maining lo bilong kantri, ol pipel i no kisim bikipela sevis na prais bilong kaikai na samting i antap tumas na givim bikipela hevi laip bilong pipel long maining eria i go hat.

Mista Basil i tok maining long Papua Niugini em i no blesing na i ken mekim lapi bilong pipel i go hat na simgaut long gavman long kamapim senis long Maining Ekt o apim royelti na ol benefit bilong papagraun.

Yes Yah ol Ridas bilong Wantok Niuspepa!

Painim Bal Resis i stat nau na bai yu gat sans long winim ol Promosen klos bilong Wantok Niuspepa! Resis i stap long pepa tude na traim laki bilong yu nau! Hariap, nogut ol klos i pinis!!

Painim Bal Resis

Putim X insait long bokis yu ting bai i stap long en..

Eksampol: C5, long namel. Teksim i kam na traim laki bilong yu.

Baim Wantok Niuspepa olgeta wik na traim sans bilong yu!

Wanpela wina tasol long olgeta wik!

Bal yu gat sans tru long winim ol samting bilong Wantok Niuspepa....

Resis bai stap inap long Disemba 2013

Teks tasol i kam long 7235 6149 wantaim ansa bilong yu na nem na adres bilong yu. Em isi tru!!!

Wanpela wina tasol long wan wan wik...

GET THE MOST OUT OF LAE, MT HAGEN AND RABAU.

PORT MORESBY TO LAE	PORT MORESBY TO MT HAGEN	PORT MORESBY TO RABAU
5 TIMES DAILY	4 TIMES DAILY	2 TIMES DAILY

Call Toll Free on **180 3444** or contact your nearest Air Niugini Travel Centre or Travel Agent for further details.

Air Niugini

www.airniugini.com.pg



Ramu NiCo putim wara saplai long ples Ainangri

OL PIPEL bilong Ainangri klostu long Kurumbukari long Ramu Projek eria long Usino-Bundi distrik nau i amamas tru long kisim gutpela klinpela wara i kam daun fres long mauntain na i ran long paip i go stret long haus bilong ol long ples.

Ol manmeri na pikinini nau bai i no ken hatwok long wokabaut longpela rot long painim wara long ol riva ol han wara nabaut. Klinpela wara nau i ran long tep na ol i ken yusim wara ya long dring, kukim kaikai, waswas na wasim klos na stap amamas.

Ramu NiCo Menesmen (MCC) Limited i helpim ol pipel bilong Ainangri long wokim kamap dispela wara saplai bilong ol long ples, na wara i stat ran long ol tep o paip-wara long stat bilong dispela mun tasol (Oktoba 7).

Planti ol lain bikman long Ainangri na ol manmeri i amamas tru long Ramu NiCo long bringim gutpela klinpela wara i go long dua bilong haus stret.

Long stat bilong dispela yia 2013 ol manmeri bilong Ainangri i bin kamapim sampela toktok long sait bilong wara na riva klostu long eria bilong ol olsem graun bilong maining i kamapim sampela doti.

Ramu NiCo i harim dispela toktok na kamapim plen long painimaut as tru bilong hevi. Kampani i salim ol lain bilong Helt, Sefti na Envairomen Dipatmen (HSE) na Komyuniti Afes dipatmen bilong en long KBK long karimaut fil sevei na tu painim wanem gutpela rot long bringim wara saplai long helpim ol manmeri na pikinini long Ainangri.

Ol lain long HSE menesmen long KBK i kamapim wanpela solusen plen long mun Februari bihain long tupela wik wok na i givim i go long KBK Menesmen long mekim rivi long wanpela fisibiliti stadi i kamap. CA dipatmen long KBK i mas wokim wok nau bihainim dispela plen.

Bihain long dispela Ramu NiCo (MCC) menesmen long KBK Main wantaim ol lida bilong Ainangri viles i sainim wanpela kontrak long wok bilong kamapim wara-sapulai projek na wara saplai enjiniaring wok bihainim dispela kontrak. Tupela lain wantaim i toktok i go kam long mekim kontrak rivi na kamapim tokorait o wanbel long wok i go het insait long tripela wik.

Sampela ol papa o lidaman bilong Ainangri i makim komyuniti long sainim kontrak long lukautim ol wokman bilong Komyuniti Afes (CA) dipatmen i wokim wok long joinim wara saplai. Ol lain papa bilong hauslain wantaim Ramu NiCo i sainim wanpela memorandum indemniti pepa long ol plesman yet i mas lukautim dispela wara saplai na lukim em i stap longpela taim long sevim nids bilong komyuniti.

Ol samting bilong mekim em kampani i stat baim long Februari 14 na bringim i go long eria long Epril 8. Tasol pastaim long dispela wok i kirap pinis long wokim ol simen long sanapim ol wara tenk.

CA opisa man husat i wokim wok long wara saplai, Munia Lulug i tok dispela wara saplai i no yusim wara pam long pamim wara i go long ples, nogat. Em i yusim fos o strong bilong wara i ran bihainim maunten tasol i kamdaun na bai go stret long ol wara

tenk na stap long hap na bihain ran i go long ol wan wan tep ol i sanapim long ol eria long ples.

Mista Lulug i tok ol i yusim tasol fos bilong greviti na wara i ran bihainim 400 mita paip stat long maunten bihainim bus, i saitim kil bilong maunten na kam daun olgeta long ples.

Ol i tok ol i sanapim tupela 9-mita longpela tenk na tu 5-pela wara tep long ples we ol i joinim wan wan wantaim ol liklik 300 mita paip gen.

Bihain long sampela mun i lukim dispela projek i pinis long Oktoba 7 na dispela i bringim bikpela amamas long bel bilong ol manmeri na pikinini long ples Ainangri.

Ramu NiCo i save amamas long wok klostu wantaim ol viles komyuniti long ol Projek eria bilong em taim i gat wanbel pasin na amamas long bringim gutpela sindaun i stap oltaim.

Dispela i soim tru bikpela het tok bilong kampani olsem "Wan Ramu NiCo, Wan Komyuniti."



CA asisten menesa Phiri i amamas wantaim manmeri bilong Ainangri wantaim ol prut.



Munia i sanap wantaim ol lain bilong Ainangri long nupela wara saplai.



Ramu NiCo CA opisa long KBK Munia Lulug i soim 400-mita longpela paip i kisim wara long maunten i kam long ples.

Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisanim.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamak rifaineri i pinis, na projek i stap redi long kisim komisanim o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

Ol dispela namba i soim klia mak bilong wok mipela i pinisim:

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

'Wanpela Ramu NiCo, Wanpela Komyuniti'

Bikpela welpam projek long Sepik Plein

SEPIK Pleins long Yangoru Sausia Distrik, Is Sepik Provins bai lukim wampela bikpela egrikalsa projek na pipel na provins bai lukim planti gutpela senis i kamap.

Long las wik, Minista bilong Tred na Indastri na memba bilong Yangoru Saussia, Richard Maru, i bin givim K5 milien long Nesenel Woks Dipatmen long statim wok long mekim rot i go long eria.

Taim em i givim dispela mani, Minista Maru i tok wok long rot i go long Sepik Pleins bai go olsem long hap we bikpela malti milien kina welpam projek long Yangoru na Sausia Distrik bai kamap long en.

Rot bai bungim ples Nagam i go long ol Sepik Pleins long Saussia Lokal Level Gavman (LLG).

Taim em i givim sekmani, Mista Maru i tok em i bikpela samting long wokim rot bikos

ol Sepik Plein i stap longwe na i no gat gutpela rot i go long hap.

Em i tok nesenel gavman i gat intres long graun long ol Sepik Plein bikos bikpela hap graun long mak i winim wan milien hekta gutpela egrikalsa graun i stap nating. Na long ol yia i go pinis, ol lida i no save lukluk long dispela hap graun i gutpela long egrikalsa.

"Long las 10 na 15 kris-mas, no gat wampela bikpela

egrikalsa invesmen projek i kamap long dispela kantri. Tupela wik i go pinis, nesenel gavman i bin tok orait long sabmisen o ripot we Nesenel Eksekutiv Kaunsel (NEC) i bin givim long dispela projek," Mista Maru i tok.

Em i tok Nesenel Gavman, Is Sepik Provinsal Gavman, investa Wilma Intenesenel Limitet, Yangoru Sausia Distrik na pipel bilong em bai kamap sea o sea holda.

Ol i ting olsem dispela projek bai givim wok long moa long 20,000 pipel.

Wilma Intenesenel Limited em i bikpela egrikalsa kampani tru long Esia. Em i operet long 50 kantri long wol na em i stap long Wol Stok Eksens. Na tu, em i 44 taim bikpela moa winim Nu Briten Welpam.

Mista Maru i tok nesenel gavman bai sainim agrimen long projek wantaim Wilma Intenesenel Limitet long

neks mun taim rot i pinis na Yangoru Sausia Distrik i kisim ol sevis.

Mista Maru i tok aninit long baset bilong neks yia, 2014, em i putim K10 milien long konektim ol rot long distrik i go long ol Sepik Plein na narapela K10 milien long baset bilong 2015.

Em i tok ol ensinia i stat wok pinis long wokim ol piksa bilong ol bris na ol sevei wok wantaim mani i kam log provinsal gavman.

Nupela teknoloji bai helpim gut ol fama

OL FAMA bilong hailans rijon bai kisim moa gutpela samting long sait bilong kaikai na mani wantaim helpim bilong gutpela teknoloji i kam long Nesenel Egrikalsa Risets Institut (NARI).

Bihain long ol risets wok long stesin na ol fam long samting olsem 59 ol narakain poteto na 79 ol kain kain pairetrum, ol i bin kisim tripela kain we i kamap gut na i ken helpim ol faming komyuniti i kamapim gutpela kaikai.

Dispela tupela nupela teknoloji NARI i bin givim i go long ol fama long taim bilong Enuel Egrikalsa So long Bubia, Morobe Provins i no longpela taim i go pinis em long tupela kain poteto na wampela pairetrum klon.

Pairetrum em i wampela plawa i ken kamap olsem bikpela keskrop long ol fama long hailans rijon we ples i koli gutpela long em i groa. Na ol fama long ol rurel komyuniti i ken groim olsem keskrop.

Bikpela hevi long pairetrum bisnis long dispela taim em ol pairetrum klon ol i gat nau i no save karim gut kaikai.

Inap 4-pela yia nau, risets wok em NARI i bin wokim long 4-pela ples antap long hailans we mak long tempetsa o hot na kol i no

wankain. Ol i testim tu graun long ol ples antap long maunten eria, na NARI i bin selektim o makim wampela bihain ol i glasim na skelim plen i karim planti plawa na i gat moa pairetin i stap long en. Dispela i soim olsem plawa i karim gut we i ken kamapim moa pairetin.

Ol bin selektim kain poteto bikos wan wan rop i karim planti moa. Na tu, ol i gat strongpela banis long sik bilong poteto ol i kolim "poteto blait" taim ol bin groim ol long ol kain ples we ol i groim poteto long en.


Ol bin kisim tupela poteto long Poteto Leit Blait Menesmen Projek we Senta bilong Intenesenel Egrikalsa Risets long Australia i fandim.

Nupela kain pairetrum ol i kolim NARI pairetrum 1 o NPY1 em ol bin givim i go long ol fama long Hailans rijon taim ol i givim tupela kain poteto i go long Fres Prodak Developmen Ejensi long tilim i go aut long ol fama. Ol i kolim tupela kain long NARI Poteto 3 o NP3 na NARI Poteto 4 o NP4.

Sapos yu laik save moa long tupela nupela teknolji na rot long planim na lukautim ol, go long NARI Hailans Rijonal Senta Tambul, Westen Hailans Provins.



Long lephan em piksa bilong E1 1 kain poteto i gro long fil long Tambul. Long raithan, em piksa bilong E11 na kain ol i kolim E20 Poteto.



NARI Pairetrum 1 (klon No 119) i karim planti plawa na i gat planti pairetra wel long en. Stori na piksa i kam long NARI Niusleta

Lukautim gut ol samting: Ghodake na Poponawa

STRONGPELA askim i go long ol pipel bilong Tambul, Westen Hailans long lukautim gut sait bilong egrikalsa bikos em bai stap oltaim long sapotim ol.

Singaut i go tu long ol long lukautim gut nupela opis bilding bilong Nesenel Egrikalsa na Risets Institut (NARI) ol bin opim long las wik.

Dairekta Jenerel bilong NARI, Dokta Ragunath Ghodake, i bin mekim ol dispela toktok long Egrikalsereel So ol bin holim long NARI Hailans Rijonal Senta long Tambul long makim 10-pela yia aniveseri taim NARI i kirapim wok long Tambul.

Memba bilong Tambul/Nebilyer long Palam, Benjamin Poponawa i sapotim Dokta Ghodake na wokim wankain toktok i go long ol pipel.

"Yupela i lukautim gut dispela

bilding na bai em i helpim yupela," Dokta Ghodake i tokim ol lain bilong Tambul eria husat i bin kamap long so na tu, long opim nupela bilding.

Dokta Ghodake i tok sampela provins olsem Westen Hailans, Jiwaka, Simbu na Isten Hailans i no gat maining risos na olsem, egrikalsa em rot long kisim mani long en. Na NARI bai helpim ol.

Em i tok pipel long eria i mas lukautim gut saiens na teknoloji o ol nupela rot long mekim samting long wanem, em ken helpim ol long inapim ol samting ol i laikim long en.

Long wankain taim, Mista Poponawa i singaut long ol pipel long lukautim gut ol sevis i go long hap bilong ol.

"Dispela nupela NARI Tambul bilding em i bilong yupela, ol pipel bilong Tambul. Lukautim gut na bai

yupela kisim ol gutpela samting. Yumi mas lukautim na amamas long ol samting NARI i mekim hia bikos dispela i bilong helpim yumi," Mista Poponawa i tok.

"Yumi no gat gol, kopa, ges, wel na ol narapela mineral risos. Mani i stap long egrikalsa. Yumi mas luksave long wok NARI i mekim hia. No gat man bai givim yupela hap graun long sindaun na olsem, stap hia long graun bilong yupela we i mo beta long raun raun nating long Lae o Mosbi," Mista Poponawa i tok.

Mista Poponawa i luksave long NARI long ol wok em i mekim long ol kain maunten ples olsem i helpim ol pipel, na moa yet long kamapim dispela so we i pulim ol stekholda o patna wantaim long lukim ol wok kamap na tu, long serim ol tingting.



INAI HADIBAIA HEREVA BE IA LAO GAVAMANI DIPATMEN, PROVINSOL BONA LOKOL LEVEL GAVAMAN DEKENAI GUDS BONA SEVISES SAPLAIAS EIAVA KOHU BONA DURUA DALA MAI DAVANA HENIA OREADIA TATA DEKENAI.

LAGANI 2013 AKOUNT KOUA GAUKARANA.

INAI HADIBAIA HEREVA BE INAI LAGANI DOKONA TOTONA, SIVARAI HENIA LAO KOHU BONA GAUKARA MAI DAVANA GAVAMAN DEKENAI KARAI TAUDIA (SAPLAIAS) BONA GAVAMAN ENA AMO DURUA ABIA DO DAVANA MONI HENIA GAVAMANI DEKENAI TAUDIA (PAYEE) TOTONA.

- **MANDE 16 DESEMBA, 2013 BE INTEGRATED LOCAL PURCHASE ORDER CLAIM (ILPOC) MATAMATANA HENIA RAKALASI NEGA BONA GAUKARA ATOA VAREAI LAO GAVAMANI ENA PGAS ACCOUNTING SYSTEM LALONAI. LAGANI 2013 ENA ILPOC MATA MATANA TA DO IDIA HENIA RAKALASI DIBA LASI 16TH DESEMBA IA HANAIA MURINAI.**
- **GAVAMANI DEKENAI KOHU BONA DURUA DALA DAVANA HENIA GAUKARA BE DO IDIA KARAI DIBA IA LAO DINA 31ST DISEMBA INAI LAGANI BEMA ILPOC NAMONA AMO IDIA KARAI NEGANAI.**
- **BEMA URA 2013 EMU SEVIS OI HENIA DAVANA ABIA NEGANAI, SAPLAIAS BE NAMO DO INVOIS LAO HENIA DIPATMENT DAIKA EMU SEVIS OI HENIA DEKENAI DINA 13 DISEMBA, BISINESI KOUA HORA IA DO DAVARIA LASI LALONAI. DAIKA SAPLAIA GUDS BONA SEVISES DINA 13TH DESEMBA 2013 MURINAI IA HENIA BONA KARAI BE UNAI DINA TAMONA INAI GAUDIA HENIA DEKENAI INVOIS DANU HENIA TAMONA, EMU DAVANA INAI LAGANI 2013 ABIA TOTONA.**
- **INVOIS PEPA BONA DAHAKA HENANDAI HAIDA IDIA NOHO PEIMENT ENA KAHANAI BE NAMO KARAI LAO DAIKA DEPARTMENT TATA EDIA PEI OFESI DEKENAI. INAI BAMONA KLEIMS EIAVA DAVANA URA ABIA TA DO KARAI LAO LASI FAINENS DIPATMENT DEKENAI, DAIKA BE DO IA DEKENAI GUDS BONA SEVISES DAVARIA GAUNA SIBONA ENA PEIMENT DO IA KARAI.**
- **LALOA BOIO LASI, TARAVATU HENUNAI BE IA NOHO, IDIA HAMOMOKANIA ILPOC SIBONA DO IDIA ABIA DAE BONA GAUKARALAI GAVAMANI LATANAI KLEIM ATOA NEGANAI.**

(Signature)

AUTHORISED BY
DR KEN NGANGAN CMA CPA
ACTING SECRETARY

Wokabaut bilong toktok bilong Kwin



INDIA: Meri stipol ses pilaia bilong India, Sudha Singh i holim Baton bilong Kwin long Taj Mahal long Agra, India bipo Baton i ran i kam olsem long PNG.



BATON: Dispela em Baton bilong Kwin we bai kamap long PNG long Novemba 4.

LONG Mande wik i kam, Novemba 4, bai Kwins Baton Rile (Queen's Baton Relay) i kamap long Papua Niugini.

Dispela Kwin Baton Rile em i bikipela pilai we i save karim toktok bilong Kwin raunim olgeta Komonwelt (Commonwealth) kantri insait long wol bipo long Komonwelt Gems i kamap.

Baton bilong Kwin bai stap tupela de tasol long PNG we em bai raun insait long Mosbi na Kavieng.

Em bai raunim Mosbi long Novemba 5 na long Kavieng long Novemba 6.

Wokabaut bilong em long Mosbi bai lukim em i stat long Independens maunten long Waigani, bihainim i go olsem long Gordon, 5 Mail, East Boroko, go daun long Bisini na pinis long Amini pak, pilai graun bilong kriket.

I gat kain kain manmeri bilong spots, gavman, bisnis, ol skul mangi na planti arapela manmeri insait long komyuniti bai stap insait long dispela pilai bilong karim dispela baton bilong Kwin na ron o wokabout bihainim rot ol i makim bilong en.

Wankain pilai bai kamap long Kavieng tu taim dispela baton bilong Kwin i go long hap.

Bai gat planti ol arapela pilai na bung i kamap long dispela taim long makim na amamasim de bilong dispela pilai.

Ol skul mangi bai pilai ol gem, ol tum-buna danis na singsing tu bai kamap long dispela taim.

Dispela Rile bilong Baton bilong Kwin o Kwins Baton Rile, i bin kamap long Mosbi pinis tasol long Kavieng, em bai namba wan taim bilong en na ol manmeri long hap i redi tasol long amamasim raun bilong en i go long hap.

Em i sans bilong ol manmeri bilong Kavieng long bung wantaim long dispela taim na amamas long soim ol kalsa na laipstail bilong ol long wol.

Wankain i bin kamap long ol arapela ples we dispela Baton i bin go long en bipo.



TOKTOK BILONG KWIN: Kwin i putim toktok bilong em i go insait long Baton na i givim long namba wan man long statim ron bilong en raunim Komonwelt.



SOIM KALSA: Taim bilong Kwins Baton Rile em i gutpela taim bilong soim kalsa na pasin bilong wan wan ples tu long ai bilong wol.



RAN WANTAIM: Ol sumatin i ran wantaim Baton bilong Kwin long Rabaul long 2005 taim em i go raun long hap.

long Delhi siti long 2010.

Ol Komonwelt kantri em ol kantri husat i luksave long Kwin olsem het bilong ol na ol dispela kantri tasol i save pilai insait long Komonwelt Gems we i save kamap bihain long olgeta 4-pela yia.

Long dispela as, Baton bilong Kwin i save raunim ol Komonwelt Kantri tasol.

Raun bilong Baton i save stat wanpela yia bipo long Komonwelt Gems na i save pinis taim em i kamap long kantri we gem bai kamap long en.

Long opening seremoni bilong gem bai laspela man o meri long karim baton bai

kisim i go na ol i opim long rausim toktok bilong Kwin we Kwin yet o wanpela husat i makim em bai ridim i go aut long ol kantri husat i kamap long pilai na opim gem.

Komonwelt Gems bai kamap gen long 2014 long Glasgow siti long Skotlen (Scotland) we Baton bilong Kwin bai go kamap long en bihain long em i raunim 70 kantri olgeta.

Em i wanpela bikipela bung we olgeta manmeri long ol Komonwelt kantri long wol i save lukluk long en.

PNG tu bai stap long ai bilong ol manmeri long wol taim yumi bung long ama-

masim raun bilong Baton i kam long hia.

Em i sans bilong yumi long soim pasin bilong amamas, wokbung na tu ol kalsa na pasin amamas yumi long dispela taim.

Sapos yu save stap long Mosbi o Kavieng, yu mas kamap na singaut amamasim ol manmeri husat bai ron o wokabout wantaim Baton bilong Kwin.

Bai yu stap insait long histri tu olsem yu i bin stap taim em i kam raun na yu lukim na amamas wantaim tu.

Yu ken kisim poto na raun lukim planti ol arapela pilai we bai kamap long dispela taim tu.

OI spot eksen poto long wiken...

OI Poto Nicky Bernard.

1

2

3

4

5

1. YUNIFOM: Nambawan Trophy i sponsaim NCD Volibal wantaim ol yunifom.

2. VOLIBAL: Namba 10 bilong Vava i paitim bal na tupela Huon Gulf i traim long stopim.


3. NETBAL: GA bilong Aussie Hai Kom i kisim bal taim pilaia bilong Air Niugini i putim was.

4. AIYO MAUS BILONG MI: Brothers pilai wantaim bal i traim long pusim pilaia bilong Sauts, tasol abrus na holim maus bilong em long semi fainel pilai bilong ol long Pot Mosbi ragbi lig. Brothers i win 20-8.

5. RAGBI: Hap bek bilong Magani i ranawe long pilai bilong Tarangau. Tarangau i win na bai bungim Brothers long gren fainel pilai bilong Pot Mosbi ragbi lig long dispela Sande.

TOKSAVE: Salim ol spots dro bilong yu kam long Feks; 325 2579, e-mel;bveo@wantok.com.pg o kam lusim long Wantok Niuspepa opis long Able Building Complex long Central Waigani, NCD.

Ragbi Wol Kap Resis..



Sonny Bill Williams i abrusim mak bilong gol..

Sonny Bill Williams bilong New Zealand i wel taim em i abrusim gol mak i go ausait na putim trai we video ref i no onaim dispela trai taim ol i pilai wantaim Samoa long Wol Kap Resis Grup B long Hallwell Jones Stadium long England. Tasol Nu Silan i winim dispela gem.



England fowet, Sam Burgess bai no inap pilai long wanpela gem bihain long em i mekim wanpela hai takol long fowet bilong Australia, Sam Thaiday long las wik pilai long Wol Kap Resis. South Sydney Rabbitho sta pilaia i kisim ripot long refri taim em i tromoi han long nek bilong Thaiday na em i kisim bagarap long liklik taim tasol. Australia i winim gem long 28-20 long England long Sande las wik.



Kevin Naiqama i bruk i go long putim trai bilong Fiji egens Ireland long Wol Kap Resis long Ingran. Fiji win 32-14

Painim Bal Resis

A B C D E F G



Putim X insait long bokis yu ting bal i stap long en..

Eksampol: **C5**, long **namel**. Teksim i kam na traime laki bilong yu.

Baim Wantok Niuspepa olgeta wik na traime sans bilong yu!!

Wanpela wina tasol long olgeta wik!

Yes yah ol Wantok!! Bai yu gat sans tru long winim ol dispela promosen samting bilong Wantok Niuspepa....




Teksim Ansa bilong yu i kam long 7235 6149 na lusim nem na adres bilong yu tu...Sans yah!

Dispela resis bai stap i go inap long Disemba dispela yia, so noken wet, salim ol ansa kam na stail wantaim Wantok kep, t-siot na kola siot!!

Painim Bal Resis

A B C D E F G



ANSA!

Bal i stap long bokis

C2

Nogat wina long Namba wan resis... Traime Namba tu resis!!

Wanpela wina tasol long olgeta wik!

Yes yah ol Wantok!! Bai yu gat sans tru long winim ol dispela promosen samting bilong Wantok Niuspepa....



Teksim Ansa bilong yu i kam long 7235 6149 na lusim nem na adres bilong yu tu...Sans yah!

Dispela resis bai stap i go inap long Disemba dispela yia, so noken wet, salim ol ansa kam na stail wantaim Wantok kep, t-siot na kola siot!!

Brothers vs Tarangau long PRL Gren Fainal

Klia trai bilong Magani i no allaw.....

BROTHERS em i namba wan tim long go insait long gren fainal bai long riplei bilong pilai bilong ol wantaim Saut long wiken antap na kisim kam long dispela wiken bihain long ol i stretim olgeta samting wantaim ol na Pot Mosbi referi.

Brothers na Saut i kik ov wantaim nupela skoa na nupela referi long namba wan semi fainal, dispela gem namel long tupela i lukim olsem em wan sait pilai we

Brothers i mekim olgeta samting long stretim pilai bilong ol i ran stret. Dispela mekim ol i go pas long skoa na pinisim wantaim win bilong long skoa 20-8.

Long mein gem bilong apinun lukim Maina Primia Magani wantaim Tarangau, dispela pilai bilong tupela long painim husat tu bai go insait long gren fainal long dispela wiken wantaim Brothers

Magani i namba wan long

skoa taim pilai i go insait long 15 minit. Banis bilong Tarangau i bin slek liklik. Dispela trai bilong Magani i mekim ol mangi Sentral strongim banis bilong ol, tasol ol woda mangi long Bomanana i kam bek wantaim wanpela trai long mekim ol i dro 4-4.

Winga bilong Magani i soim spit ran bilong em taim hap bek bilong kikim wanpela i go daun long mak bilong Tarangau. Winga bilong

ol Tarangau i leit long kisim na winga bilong Magani kam kisim bal tasol na ran stret long namel bilong mak long putim trai. Dispela i mekim Magani go pas long skoa 10-4 taim kik go insait.

Tarangau i kam bek strong long skoa long mekim skoa kam i klostu long 10-8 bipo long tupela tim go malolo.

Long namba tu hap tupela tim i wantaim i pilai wankain gem plen na wankain pilai tasol, olsem na tupela tim

wantaim i no skoa hariap.

Magani gat sans stret long pinisim pilai wantaim win taim winga bilong ol i takolim pilala bilong Tarangau wan wan na em i kisim bal long pilala bilong Tarangau na go skoa stret long namel. Dispela trai bilong Magani i mekim referi na lains man i paul na tupela askim tupela long kamap wantaim wanpela disisen long tok nogat long trai na givim skram go long Magani. Dispela tu i

mekim ol sapota bilong Magani husat i stap klostu na lukim i kros na bikmaus long referi.

Tarangau i strongim difens bilong em na holim ol Magani long mak bilong ol inap ol Magani i pundaunim bal long mak bilong ol. Dispela givim bikpela sans long Tarangau long skoa bihain long skram na bringim skoa go 10-8. Tarangau nau bai bungim Brothers long dispela Sande gren fainal.

PMSA bai go long Besta Kap Fainel

POT Mosbi Soka Asosiesen bai kisim nem bilong Sauten rijon long go pilai long fainel bilong Besta Kap long Lae long Novemba 14 bihain long tim bilong ol man na meri i winim pilai bilong ol long Alotau.

Oi PMSA man bai go insait long fainel wantaim ol mangi Kaupa bilong ples Kaparoko long Sentral Provins na winim ol 3-1. Maski ples i wet long bikpela ren long Alotau ol PMSA i kamapim strongpela pilai stret long winim gem.

Kaupa i bin winim NCDPSSA long go insait long fainel wantaim ol PMSA. Oi mangi Kaupa wantaim helpim bilong biknem straika Kema Jack i daunim NCDPSSA long semi fainel.

Oi mangi Kaparoko go long fainel wantaim PMSA long lukim husat bai king bilong soka insait long Sauten rijen, tasol PMSA i strongim sait bilong ol yet long stap king na winim ol Kaupa 3-1.

Maski Kaupa i lus tasol em bai kisim nem bilong ol

Sentral long go pilai long Lae long dispela Besta Kap fainel.

Long pilai bilong ol meri, ol yangpela meri Tabubil i pait strong long kam insait long fainel wantaim ol PMSA.

Dispela pilai bilong i go insait long ekstra taim, tupela wantaim bin stap dro 0-0 long namba wan hap na long namba tu hap tu i wankain tasol. Dispela i mekim refri long givim tupela tim ekstra taim.

Oi meri star maunten i soim difens bilong ol na banisim gol mak bilong ol gut tru long namba wan hap bilong ekstra taim. PMSA i kam bek long namba tu hap bilong ekstra taim wantaim ol ekspirien pilai bilong ol long wanem ol daun long wanpela meri. Dispela ekspirien bilong ol i mekim na ol daun Tabubil 1-0 klostu long ekstra taim pinis.

PMSA man na meri na Kaupa bai go pilai long narapela raun bilong rijinol Besta Kap long Lae long Novemba 14 i go inap long 16.

Vava i king bilong volibal

Nicky Bernard i raitim

VABUKORI Volibal Asosiesen em ol king bilong Volibal long Papua Niugini. Vava tim i stap long open tim bilong ol man i winim dispela taitol insait Nesanel Sempionsip long Pot Mosbi long namba ten taim nau.

Vava i pilai egensim Huon Gulf long gren fainel long Mande nait long Sir John Guise Indoor Kompleks long Pot Mosbi long ai bilong planti ol sapota bilong volibal.

Oi yangpela bilong Huon Gulf i pilai strong tru insait long dispela Nesanel Sempionsip bihain long ol stap

aut long volibal pilai sampela yia olgeta.

Oi I bin autim NCD na Fairfax na kisim ol go insait long gren fainel wantaim Vava.

Oi mangi Morobe i no strong tumas long pilai bilong ol long fainel olsem na ol mangi Vabukori i winim ol long tripela set olgeta.

Vava nau i holim dispela taitel long 10-pela yia olgeta. Anda 21 tim bilong man bilong ol tu i winim pilai bilong wantaim Hula.

Long gem bilong ol meri, Fairfax Blu i winim Fairfax Wait long ol open divisen na Nambawan Trophy NCD i winim Fairfax long anda 21.

Pot Mosbi amata Boksen Klap tonamen i strong yet

Frieda Sila Kana i raitim

OL NCD Amata Boksen Klap i holim wanpela tonamen long Gavera, Taurama Rot long Sarere na Sande long wik i go pinis.

Dispela tonamen i lukim ol amata klap i kam long tripela ilektoret bilong NCD na tupela ples long Sentral Provins em Tubusereia na Porebada.

Man husat i wok long helpim ol amata refri, na i go pas long tonamen em, Alex Rihatta, Vais Presiden bilong PNG Profesenel Boksen na PNG Boksing Yunien, Siaman bilong Refri na Jas bilong Profesenel Boksen long PNG, na memba bilong Intenesenel Refri na Wol Profesenel Boksen Federesen, na memba bilong US Boksen Kaunsil.

Dispela man i gat bikpela namba tru long boksen tasol em i daunim em yet na kamap refri long dispela tupela de tonamen. Mista Rihatta em i wanpela tasol long Osenia na Pasifik long stap olsem wanpela Intenesenel Refri.

Bikpela tingting bilong Mista Rihatta em long NCD Profesenel Boksing na Amata Boksing i mas wok bung wantaim long redim ol boksa man na meri, olupela na nupela wantaim, long stap fit na redi olgeta taim long go insait long 2015 Pasifik Gems.

Mista Rihatta i lukim olsem ol PNG Boksen Yunien i no wok long helpim ol amata klap long helpim ol boksa long kamapim gutpela stail na strong bilong pait, olsem na em i wok long helpim ol. Em i gat 6-pela amata refri i helpim em long refri na kamap ol jas long ol tonamen i save kamap nau olgeta tupela wik. Namel long ol em i gat wanpela meri tu em trening refri na jas.

Insait long NCD olgeta boksen klap em ol profesenel boksa bilong PNG i ronim.

"Olsem na mi i singaut long PNG Boksen Yunien na NCD Amata Boksen Asosiesen long ol i mas wok bung wantaim ol amata boksing klap. Planti ol amata boksa i stap long ol dispela klap i save makim PNG long ol gems long narapela kantri," Mista Rihatta i tok.



Tupela amata boksa i makim ret na blu kona i pamim long ring long Gavera Amata boksing tonamen long las wiken – Intenesenel Refri Alex Rihatta i refri long dispela taim.

Planti boksen baut em ol amata refri i save refri long ol tasol Alex i save helpim tasol long taim ol boksa i gat moa ekspirien long pait, i save pilai.

Mista Rihatta i singaut long olgeta NCD klap long ol i mas baim rejistresen fi bilong ol i go long NCD Amata Boksen Asosiesen long kamap olsem memba. Rejistresen em K250 long wan wan yia.

Oi i save gat ol medikal sek bipo long ol i larim ol boksa i go insait long ring. Wik bihain bai ol i holim long Taurama Nambis.

Sampela wina bilong las wik tonamen long ol sinia boksa, Allan Oaika, bilong wantoks klap pait wantaim Marley Peni bilong Kesi klap. Allan i win long laik bilong olgeta jas. Roy Gavera bilong Socay klap i winim baut taim em i pait wantaim Glen Kila bilong Kesi klap.

Aninit long ol Novis man, Poro Richard bilong Kondo Is klap i winim baut wantaim Frank Decklam bilong Socay klap. Richard Poro i win taim refri i stopim baut bilong wanem, wanpela pilala i kisim bagarap long namba wan minit bilong raun 2.

Aninit long ol kedet, krimas bilong ol 9 i go long 12, James Rocky bilong Wanigela klap i pait wantaim

Simon Micky bilong Kesi klap na Rocky winim dispela baut.

Oi meri amata boksa em Naomi Cholai bilong Socay klap i winim baut taim em pait

wantaim R George bilong Wantoks klap. I gat 8-pela meri baut olgeta em 78 baut bilong ol man na meri wantaim.





Moa oil na meat insait

TUNA IN OIL

Tarangau kisim sapot bilong fainel



Nicky Bernard i raitim

HEKARI Tarangau i kisim las helpim bilong dispela yia long sponsa bilong ol Hekari Holdings long strongim ol long gren fainel long dispela wiken.

Pikinini bilong man husat statim Tarangau tim na tu olpela Tarangau pilaia John Kapinato Junia i go givim las hap K15,000 insait long K50,000 sponsasip bilong tupela i go long ol pilaia na tim menesmen long Trinde.

Kapinato i tokim ol pilaia na menesmen olsem, dispela mani em bilong helpim ol i redim ol samting bilong dispela gren fainel bai kamap long wiken. Em tok dispela em las hap mani Hekari Holdings i no givim yet na em i rait taim stret long givim long ol pilaia bai mas redim ol long pilai.

"Mi em dai hat Tarangau. Mi save pilai long dispela tim long wanem papa bilong mi i statim taim em stap woda man, na bipo em go em tokim mi long

sapotim dispela tim long wanem samting ol laikim," Kapinato i tok.

Em i tokim ol pilaia olsem disaplin insait long pilai graun na sapsait em bikipela samting, autas disaplin i stap bai tingting i kaikai.

Hekari Holding em bikipela sponsa bilong Tarangau longpela taim nau na dispela sponsasip bilong ol, save stap olgeta tupela yia.

Kapinato i tok, ol lain bilong em long ples na Hekari bai stap baksait long Tarangau long gren fainel bilong ol na em tok gut lak long ol pilaia.

Het Kosa bilong tim James Naipao i tok dispela gren fainel em bai namba 12 gren fainel bilong ol. Ol i bin winim 8-pela na sapos ol win long dispela wiken bai namba 9 win bilong ol.

Em i tok tu olsem, ol pilaia em ol pikinini bilong ol woda na ol lain i stap klostu long Bomana, na em i kisim ol na lainim ol long pilai na nau ol bai pilai long gren fainel.

Wokabaut bilong toktok bilong Kwin: Pes 24



PMV

DIESEL OIL



PMV OIL BILONG YUMI

BOROKO MOTORS

PORT MORESBY	☎ 325 5255
LAE	☎ 472 1144
MT HAGEN	☎ 542 1933
TABUBIL	☎ 649 9048
KIMBE	☎ 983 5035
MADANG	☎ 422 2659
KOKOPO	☎ 982 8193
GOROKA	☎ 532 3552

Email: info@borokomotors.com.pg
Website: www.boroko-motors.com